

四庫全書

史部

欽定四庫全書

史部  
元史卷十四至  
十六

御史<sub>臣</sub>徐如澍覆勘

總校官編修<sub>臣</sub>朱鈐

欽定四庫全書

元史卷十四

明翰林學士亞中大夫知制誥兼修國史宋濂等修

本紀第十四

世祖十一

二十三年春正月戊辰朔以皇太子故罷朝賀禁齋金銀銅錢越海互市甲戌帝以日本孤遠重困民力罷征日本召阿巴齊赴闕仍散所領民船以江南廢寺田土

為人占據者悉付總統嘉木揚喇勒智修寺己卯立羅  
卜和台色辰鄂端等驛呂文煥以江淮行省右丞告老  
許之任其子為宣慰使庚辰馬八國遣使進銅盾壬午  
太陰犯軒轅太民遣使代祀嶽瀆東海癸未罷鞏昌二  
十四城拘權所以其事入有司發鈔五千錠糴糧于沙  
靜隆興從僧格請命嘉木揚喇勒智遣宋宗戚謝儀孫  
堅全允趙沂趙太一入質甲申和塔拉言所部屯田新  
軍二百人鑿河渠於額齊訥役久功大乞以傍近民西

僧餘戶助其力從之噶蘇達使人言軍士疲乏者八百餘人乞賑贍宜於托多爾海處驗其虛實帝曰比遣人往事已緩矣其使贍之丁亥焚陰陽偽書顯明厯辛卯命阿爾哈雅等議征安南事宜癸巳陞福州長溪縣為福寧州以福安寧德二縣隸之丙申以新附軍千人屯田哈斯罕關東曠地官給農具牛種丁酉畋于近郊降敘州為縣隸蠻夷宣撫司詔禁沮擾鹽課設諸路推官以審刑獄上路二員中路一員陞隆興武寧縣為寧州

以分寧隸之二月己亥勅中外凡漢民持鐵尺手撾及杖之藏刃者悉輸官辛丑遣使以鈔五千錠賑諸王錫錫所部饑民甲辰以舒蘇德濟為緬中行省左丞相阿勒坦托噶叅知政事額特默色簽行中書省事以阿爾哈雅仍安南行中書省左丞相鄂囉齊平章政事都元帥烏瑪喇伊克穆蘇阿里答順樊楫並叅知政事遣使諭皇子額森特穆爾調合剌章軍千人或二三千付阿爾哈雅從征交趾仍具將士姓名以聞乙巳廷議以東

北諸王所部雜居其間宣慰司望輕罷山北遼東道開  
元等路宣慰司立東京等處行中書省以庫庫尼敦為  
左丞相遼東道宣慰使達春右丞同簽樞密院事楊仁  
風宣慰使伊爾蘇克並叅知政事敕中書省太府監所  
儲金銀循先朝例分賜諸王復立大司農司專掌農桑  
陞宣徽院正二品降鎮巢府為巢州丙午太陰犯井丁  
未用御史臺臣言立按察司巡行郡縣法除使二員留  
司副使以下每歲二月分蒞按治十月還司戊申樞密

院奏前遣蒙古軍萬人屯田所獲除歲費之外可糶鈔三千錠乞分廩諸翼軍士之貧者帝悅令從便行之調京師新附軍二千立營屯田癸丑復置隰州大寧縣丁巳命湖廣行省造征交趾海船三百期以八月會欽廉州戊午併江南行樞密院四處入行省命荆湖占城行省將江浙湖廣江西三行省兵六萬人伐交趾荆湖行省平章鄂囉齊以征交趾事宜請入覲詔乘傳赴闕集賢直學士程文海言省院諸司皆以南人叅用惟御史



臺按察司無之江南風俗南人所諳宜叅用之便帝以語伊蘇特穆爾對曰當擇賢者以聞帝曰汝漢人用事者豈皆賢邪江南諸路學田昔皆隸官詔復給本學以便教養封陳益稷為安南王陳秀峻為輔義公仍下詔諭安南吏民復立岳鄂常德潭州靜江推茶提舉司癸亥太史院上授時厯經厯議敕藏于翰林國史院甲子復以平原郡公趙與芮江南田隸東宮立甘州行中書省丙寅以編地里書召曲阜教授陳儼京兆蕭軒蜀人

虞應龍唯應龍赴京師三月己巳御史臺臣言近奉旨  
按察司叅用南人非臣等所知宜令侍御史行御史臺  
事程文海與行臺官博采公潔知名之士具以名聞帝  
命賫詔以往太陰犯婁浚治中興路河渠省雲和署入  
教坊司辛未降梅循為下州甲戌雄霸二州及保定諸  
縣水泛溢冒官民田發軍民築堤禦之乙亥以敏珠爾  
丹仍中書右丞與郭佑並領錢穀楊居寬典銓選立欽  
察衛親軍都指揮使司賜諸王托歡特穆爾羊二萬丙

子大駕幸上都詔行御史臺按察司以八月巡行郡縣  
中書省臣言阿哈瑪特時諸王駙馬往來餉給之費悉  
取於萬億庫後徵百官俸入以償非便詔在籍者除之  
勿徵以榷茶提舉李起南為江西榷茶轉運使起南嘗  
言江南茶每引價三貫六伯丈今宜增每引五貫事下  
中書議因令起南為運使置達嚕噶齊處其上丁丑徙  
東京行省中書于咸平府癸巳歲星犯壘壁陣以臨江  
路為北安王分邑夏四月庚子中書省臣請立汴梁行

中書省及燕南河東山東宣慰司有旨南京戶寡盜息不必置省其宣慰司如所請濟南乃星納噶爾分地太原乃阿濟格分地其令各衛委官一人同治之敕免雲南從征交趾蒙古軍屯田租立烏蒙站江南諸路財賦並隸中書省雲南省平章尼雅斯拉擢上便宜事一曰弛道路之禁通民來往二曰禁負販之徒毋令從征三曰罷達爾丹站賦民金為飲食費四曰聽民伐木貿易五曰戒使臣勿擾民居立急遞鋪以省驛騎詔議行之

辛丑陝西行省言延安置屯田鷹坊總管府其和斯布  
哈軍逃散者皆入屯田今復供秦王阿南達所部阿克  
達實飼馬及輸他賦有旨皆罷之其不悛者罪當死甲  
辰行御史臺自杭州徙建康以山南淮東淮西三道按  
察司隸內臺增置行臺色目御史員數丁未江東宣慰  
司進芝一本庚戌制謚法壬子樞密院尼雅斯拉斡言  
前所統漸丁軍五千征打馬國其力已疲今諸王復籍  
此軍征緬宜取進止帝曰苟事力未損即遣之仍諭尼

雅斯拉鼎分阿拉克展蒙古軍千人赴交趾助皇子托  
歡已未遣約蘓穆爾勾考荆湖行省錢穀中書擬約蘇  
穆爾平章政事托克托呼叅知政事有旨約蘇穆爾小  
人事朕方五年授一理算官足矣托克托呼人奴之奴  
令吏宣使才也讀卿等所擬令人恥之其以朕意諭安  
圖以漢民就食江南者多又從官南方者秩滿多不還  
遣使盡徙北還仍設托克托和斯於黃河江淮津渡凡  
漢民非齎公文適南者止之為商者聽中書省臣言比

奉旨凡為盜者毋釋今竊鈔數貫及佩刀微物與童幼竊物者悉令配役臣等議一犯者杖釋再犯依法配役為宜帝曰朕以漢人徇私用泰和律處事致盜賊滋眾故有是言人命至重今後非詳讞者勿輒殺人五月丁卯朔樞密院臣言臣等與伊蘇特穆爾議巴實伯里軍事凡軍行並聽已延節制其留務委博囉岱及諸王阿濟格官屬統之為宜從之己巳熒惑犯太微西垣上將荆湖行省阿爾海雅言約蘇穆爾在鄂省勾考豈無貪

賄臣亦請勾考之詔遣叅知政事圖爾哈樞密院判李  
道治書侍御史陳天祥偕行甲戌汴梁旱徙江東按察  
司于宣州庚辰歲星犯壘壁陣乙酉熒惑犯太微右執  
法勅遣耽羅戍兵四百人還家庚寅廣平等路蠶災辛  
卯霸州瀛州蝻生安南國遣使來貢方物癸巳京畿旱  
六月丙申朔太白犯御女辛丑中書省臣言圖爾哈奏  
前約蘇穆爾阿爾哈雅互請鉤考今阿爾哈雅雖已死  
事之是非當令暴白帝曰卿言良是其連引諸人近者



即彼追逮遠者宜上聞此事自約蘇穆爾所發當依其  
言究行之乙巳以立大司農司詔諭中外皇孫特穆爾  
布哈駐營亦奚不薛其糧餉仰於西川遠且不便徙駐  
重慶府詔以大司農司所定農桑輯要書頒諸路命雲  
南陝西二行省籍定建都稅賦戊申括諸路馬凡色目  
人有馬者三取其二漢民悉入官敢匿與互市者罪之  
辛亥以伊馬克塔圖古哩克使交趾癸丑湖廣行省顯  
格言今征交趾分本省戍兵三萬八千七百人期以七

月悉會靜江今已發精銳啓行餘萬七千人八百皆羸病屯田等軍不可用敕今歲姑罷之丁巳設陝西等路諸站總管府從三品庚申甘肅新招貧民百一十八戶敕廩給之敕路府州縣捕盜者持弓矢各路十副府州七副縣五副以色徹肯為中書省平章政事辛酉封楊邦憲妻田氏為永安郡夫人領播州安撫司事遣鎮西平緬等路招討使齊喇招諭緬國廣元路閩中麥秀兩歧高麗國遣使來貢秋七月丙寅朔遣巴喇瑪等使爪

哇已已用中書省臣言以江南隸官之田多為強豪所據立營田總管府其所據田仍履畝計之復尚醞監為光祿寺罷遼陽等處行中書省復北京咸平等三道宣慰司給特古斯哈達貧民幣帛各二千布千匹庚午江淮行省孟古岱言今置省杭州兩淮江東諸路財賦軍實皆南輸又復北上不便揚州地控江海宜置省宿重兵鎮之且轉輸無往返之勞行省徙揚州便從之立淮南洪澤芍陂兩處屯田壬申平陽饑民就食鄰郡者所

在發倉賑之置中尚監右丞拜達勒將兵討阿蒙并其妻子禽之皆伏誅丁丑諤特古斯部民饑遣就食北京其不行者發米賑之以雄易二州復隸保定給和林軍儲自京師輸米萬石發鈔即其地糴米萬石辛巳巴圖爾饑民六百戶駐巴勒噶遜之地給米千石賑之壬午總制院使僧格具省臣姓名以上帝曰右丞相安圖右丞敏珠爾丹叅知政事郭佑楊居寬並仍前職以特穆爾為左丞其左丞相昂吉爾岱平章政事阿必實克和

塔拉皆別議諭中書選可代者以聞給金齒國使臣圓符癸巳銓定省院臺部官詔諭中外中書省除中書令外左右丞相並一員平章政事二員左右丞並一員叅知政事二員行中書省平章政事二員左右丞並一員叅知政事簽行省事並二員樞密院除樞密院使外同知樞密院事一員樞密院副使簽樞密院事並二員樞密院判一員御史臺御史大夫一員中丞侍御史治中侍御史並二員行臺同六部尚書侍郎郎中員外郎並

二員其餘諸衙門並委中書省斟酌裁減八月丙申發鈔二萬九千錠鹽五萬引市米賑諸王阿濟格所部饑民已亥敕樞密院遣侍衛軍千人扈從北征平陽路歲比不登免貧民稅賦罷淮東蘄黃宣慰司以黃蘄壽昌隸湖廣行省安慶六安光州隸淮西宣慰司招集宋鹽軍以市舶司隸泉州府司乙卯太白犯軒轅右角辛酉婺州永康縣民陳吳四等謀反伏誅甘州饑禁酒罷德平定昌二路置德昌軍民總管府九月乙丑朔馬八兒須

門那僧急里南無力馬蘭丹那旺丁呵兒來來急關亦  
帶蘇木都刺十國各遣子弟上表來覲仍貢方物以太  
廟雨壞遣昂吉爾岱致告奉安神主別殿甲申太陰犯  
天關壬辰高麗遣使獻日本俘是月南部縣生嘉禾一  
莖九穗芝產于蒼溪縣冬十月甲午朔太白犯右執法  
以南康路隸江西行省徙浙西按察司治杭州罷諸道  
提刑按察司判官行御史臺監察御史及按察司官雖  
漢人並毋禁弓矢襄邑縣尹張玘為治有績鄒平縣達

嚕噶齊和和能捕盜理財進秩有差丁酉享于太廟戊戌太陰犯建星己亥車駕至自上都壬寅太白犯左執法遣兵千人戍輝和爾境乙巳賜哈瑪爾貧民及哈喇和卓民牛種給鈔共萬六千二百錠哈瑪爾民加賜幣帛並千匹己酉遣多托爾台楊烏嚕克台以兵萬人船千艘征古桂中書省具宣徽大司農大都上都留守司存減員數以聞帝曰在禁近者朕自沙汰餘從卿等議之辛亥太陰犯東井河決開封祥符陳留杞太康通許



鄆陵扶溝洧川尉氏陽武延津中牟原武睢州十五處  
調南京民夫二十萬四千三百二十三人分築隄防癸  
丑諭江南各省所統官軍教練水軍遣侍衛新附兵千  
人屯田巴實伯里置元帥府即其地總之甲寅太白犯  
進賢以征緬功調招討使張萬為征緬副都元帥額森  
特穆爾征緬招討司達嚕噶齊千戶張成征緬招討使  
並虎符敕造戰船將兵六千人以征緬俾圖們岱為都  
元帥總之乙卯給皇子托歡馬四千匹部曲人三匹庚

申濟寧路進芝二莖壬戌改河間鹽運司為都轉運使  
司徒戍甘州新附軍千人屯田中興千人屯田伊里哈  
高麗遣使來獻日本俘十六人馬法國進鞍勒韁甲興  
化路仙游縣蟲傷禾十一月乙丑中書省臣言朱清等  
海道運糧以四歲計之總百一萬石斗斛耗折願如數  
以償風浪覆舟請免其徵從之遂以昭勇大將軍沿海  
招討使張瑄明威將軍管軍萬戶兼管海道運糧船朱  
清並為海道運糧萬戶佩虎符敕禽獸字孕時無許改

獵戊辰太白犯亢遣蒙古千戶庫春等總新附軍四百人屯田巴實伯里己巳改思明等四州並為路以阿巴齊為征交趾行省右丞丙子以涿易二州良鄉寶坻縣饑免今年租給糧三月平灤太原汴梁水旱為災免民租二萬五千六百石有奇改廣東轉運市舶提舉司為鹽課市舶提舉司丁丑命塔奇爾哈納使諤爾根戊寅遣使閱實宣寧縣饑民周給之己卯太陰犯井辛巳歲星犯壘壁陣十二月乙未賑遼東開元饑三月戊戌太

白犯東咸癸卯約蘇穆爾籍阿爾哈雅家貲運至京師  
賜諸王珠卜所部軍五千人銀萬五千錠鈔三千錠特  
默齊二千人羊七萬丙午置燕南河東山東三道宣慰  
司罷大有署丁未太陰犯井乙卯詔諸道宣慰司在內  
地者設官四員江南者六員以阿爾哈雅所芘逃民無  
主者千人屯田遣中書省斷事官圖卜新復鉤考湖廣  
行省錢穀復置泉州市舶提舉司大都饑發官米減價  
糴貧民丙辰遣布濟克齊貧民墾甘肅閒田官給牛種

農具賜安南國王陳益稷羊馬鈔百錠丁巳太陰犯氐  
戊午翰林承旨色埒默言國史院纂修太祖累朝實錄  
請譯以輝和爾字俟奏讀然後纂定從之諸路分置六  
道勸農司庚申置尚珍署於濟寧等路秩從五品是歲  
以伊實策凌為帝師賜王子鄂囉齊托歡諸王珠卜額  
布根等羊馬鈔一十五萬一千九百二十三錠馬七千  
二百九十匹羊三萬六千二百六十九口幣帛毳毼木  
綿三千二百八十八匹貂裘十四又賜皇子托歡所部

婁雅蘇布哈等及謙州諸局工匠鈔五萬六千一百三十九錠一十二兩命西僧遞作佛事于萬壽山玉塔殿萬安寺凡三十會大司農司上諸路學校凡二萬一百六十六所儲義糧九萬五百三十五石植桑棗雜菓諸樹二千三百九萬四千六百七十二株斷死刑百一十四人

二十四年春正月乙丑復雲南石梁縣戊辰以修築柳林河堤南軍三千浚河西務漕渠皇子鄂囉齊部曲饑

命大同路給六十日糧免唐古衛河西地元籍徭賦壬  
申御正殿受諸王百官朝賀癸酉俱藍國遣使不六溫  
乃等來朝甲戌太陰犯東井乙酉太陰犯房丙戌以叅  
政程鵬飛為中書右丞阿里為中書左丞丁亥以巴雅  
爾哈雅為叅知政事發新附軍千人從阿巴齊討安南  
弛女直碩達勒達弓矢之禁復改江浙省為江淮行省  
戊子以鈔萬錠賑鄂端貧民西邊歲饑民困賜絹萬匹  
庚寅遣使代祀嶽瀆后土東海辛卯以淮東淮西山南

三道按察司隸行御史臺立上林署秩從七品詔發江  
淮江西湖廣三省蒙古漢券軍及雲南兵及海外四州  
黎兵命海道運糧萬戶張文虎等運糧十七萬石分道  
以討交趾置征交趾行尚書省鄂囉齊平章政事烏瑪  
喇樊楫叅知政事總之並受鎮南王節制二月壬辰朔  
遣使持香幣詣龍虎閣皂三茅設醮召天師張宗演赴  
闕癸巳永古特部饑發米四千石賑之不足復給六千  
石價甲午畋于近郊乙未以敏珠爾丹為平章政事真



定路饑發沿河倉減價糶之以真定所牧官馬四萬餘匹分牧他郡禁輝和爾地禽獸孕孳時畋獵庚子太陰犯天關辛丑太陰犯東井甲辰陞江淮行大司農司事秩二品設勸農營田司六秩四品使副各二員隸行大司農司以范文虎為中書右丞商議樞密院事壬子封駙馬昌吉為寧濮郡王設都總管府以總皇子北安王民匠鄂端大小財賦中書省臣言自正旦至二月中旬費鈔五十萬錠臣等兼總財賦自今侍臣奏請賜賚乞

令侍臣預議帝曰此朕所當慮仍諭伊蘇特穆爾伊徹  
穆爾知之丙辰馬八兒國貢方物戊午敕諸王閭里鐵  
木兒節制諸軍以趙與芮子孟桂襲平原郡公納延遣  
使徵東道兵諭實喇特穆爾毋輒發閏二月癸亥太陰  
犯辰星以女直碩達勒達連歲饑荒移粟賑之仍盡免  
今年公賦及減所輸皮布之半以宋畬軍將校授管民  
官散之郡邑敕春秋二仲月上丙日祀堯帝祠西京等  
處管民官瑪哈穆特自言歲以西京平陽太原課額外

羨錢市馬馳千輪官而實盜官錢市之按實伏誅乙丑  
改于近郊召敏珠爾丹特穆爾楊居寬等與集賢大學  
士諤爾根薩里及葉李程文海趙孟頫論鈔法敏珠丹  
上言自制國用使司改尚書省頗有成效今仍分兩省  
為便詔從之各設官六員其尚書以僧格特穆爾平章  
政事諤爾根薩里右丞葉李左丞馬紹叅知政事餘一  
員議選回回人充中書宜設丞相二員平章政事二員  
叅知政事二員省隴右河西道提刑按察司分置鞏昌

者入甘州設官五員以鞏昌改隸京兆提刑按察司設  
官六員省太原提刑按察司分置西京者入太原辛未  
以復置尚書省詔天下除行省與中書議行餘並聽尚  
書省從便以聞設國子監立國學監官祭酒一員司業  
二員監丞一員學官博士二員助教四員生員百二十  
人蒙古漢人各半官給紙劄飲食仍隸集賢院設江南  
各道儒學提舉司甲申太陰犯牽牛車駕還宮乙酉改  
溜萊路為般陽路置錄事司大都饑免今歲銀俸鈔諸

路半徵之罷江南竹木柴薪及岸例魚牙諸課停不急  
之務敢行省宣慰司勿濫舉官吏受除官延引歲月不  
即之任者追所受宣勅鎮南王托歡徙鎮南京改福建  
市舶都漕運司為都轉運鹽使司范文虎改尚書右丞  
商議樞密院事改行中書省為行尚書省六部為尚書  
六部以吏部尚書實都為尚書省叅知政事庚寅大駕  
幸上都扎爾古齊哈喇斯等言去歲審囚官所錄囚  
數南京濟南兩路應死者已一百九十人若總校諸路

為數必多宜留扎爾古齊數人分道行刑帝曰囚非羣  
羊豈可遽殺耶宜悉配隸淘金三月甲午更造至元寶  
鈔頒行天下中統鈔通行如故以至元寶鈔一貫文當  
中統交鈔五貫文子母相權要在新者無冗舊者無廢  
凡歲賜周乏餉軍皆以中統鈔為准禁無籍自効軍擾  
民仍籍充軍丙申太陰犯東井乙卯幸涼陘遼東饑弛  
太子河捕魚禁丙辰馬八兒國遣使進奇獸一類騾而  
巨毛黑白間錯名阿塔必即降重慶路定遠州為縣命

都水監開汶泗水以達京師汴梁河水泛溢役夫七千  
修完故堤夏四月癸酉太陰犯氐甲戌太陰犯房申申  
實都奏發新鈔十一萬六百錠銀千五百兩十三錠金  
百兩付江南各省與民互市是月諸王納延反五月己  
亥遣顧森傳旨諭北京等處宣慰司凡隸納延所部者  
禁其往來毋令乘馬持弓矢庚子以布爾罕總領特默  
齊軍三千人出征移濟南宣慰司治益都燕南按察司  
治大名南京按察司治南陽太原按察司治西京復立

豐州伊勒錦站壬寅以御史臺吏王良弼等誹訕尚書省政事誅良弼籍其家餘皆斷罪用僧格言置上海福州兩萬戶府以維制沙布鼎烏瑪喇等海運船戶工兩部各增尚書二員授高麗王睿行尚書省平章政事罷諸站托克托和斯括江南諸路匠戶沙布鼎言江南各省南官多每省宜用一二人帝曰除陳巖呂師夔管如德范文虎四人餘從卿議帝自將征納延發上都括江南僧道馬匹詔范文虎將衛軍五百鎮平灤以奇徹為



親軍都指揮使伊蘇岱爾右衛簽事王通副之甲辰免  
北京今歲絲銀仍以軍旅經行給鈔三千錠賑之壬子  
高麗王賄請益兵征納延以五百人赴之六月庚申朔  
百官以職守不得從征納延願獻馬以給衛士壬戌至  
實喇圖嚙之地納延黨塔布岱率兵六萬逼行在而陣  
遣前軍敗之乙丑敕遼陽省督運軍儲壬申發諸衛軍  
萬人蒙古軍千人戍豪懿州諸王蘇都爾所部特爾格  
率其黨取咸平府渡遼欲劫取豪懿州守臣以乏軍求

援敕以北京戍軍千人赴之括平灤路馬北京饑免絲  
銀租稅乙亥霸州益津縣霖雨傷稼以陝西涇邠乾及  
安西屬縣間田立屯田總管府置官屬秩三品車駕駐  
齊達勒鄂爾多之地獲納延輜重千仍禁止秋毫無犯  
秋七月癸巳納延黨蘇都爾犯咸平宣慰達春從皇子  
阿雅噶齊軍出潘州進討宣慰伊爾蘇克分兵趣懿州  
其黨悉平丁酉弘州匠官以犬兔毛製如西錦者以獻  
授匠官知弘州戊戌太陰犯南斗樞密院奏簽征緬行

省事阿薩爾哈雅言比至緬國諭其王赴闕彼言鄰番  
數叛未易即行擬遣阿難答刺奉表齎貢入覲辛丑太  
陰犯牽牛壬寅熒惑犯輿鬼庚戌雲南行省愛魯克言  
金齒酋打奔等兄弟求內附且乞入覲壬子太陰犯司  
怪癸丑日暈連環白虹貫之罷納延所署益都平灤額  
布根河間分地達嚕噶齊及星納嚕爾濟南分地所署  
官移北京道按察司置豪州免東京等處軍民徭賦陞  
福建鹽運使司依兩淮等例為都轉運使司以中興府

隸甘州行省以河西呼雅克齊所部屯軍同沙州居民  
修城河西瓜沙等處立色辰屯田八月癸亥太白犯亢  
濬州進瑞麥一莖九穗乙丑車駕還上都以李海拉蘇  
為征緬行省叅政將新附軍五千特默齊軍一千以行  
仍調四川湖廣行省軍五千赴之召能通白夷金齒道  
路者張成及前占城軍總管劉全並為招討使佩虎符  
從征以圖們岱爾為都元帥將四川省兵五千赴緬省  
仍令其省駐緬近地以俟進止置江南四省交鈔提舉

司己巳謫從叛諸王赴江南諸省從軍自効諭鎮南王  
托歡禁戢從征諸王及省官鄂囉齊等毋縱軍士焚掠  
毋以交趾小國而易之癸酉托多爾海獲叛王安濟蘇  
赦之額齊訥路屯田總管和塔拉請疏浚管內渠河從  
之丙子填星南犯壘壁陣已卯太陰犯天關辛巳太陰  
犯東井甲申太白犯房丁亥潘州饑又經納延叛兵蹂  
踐免今歲之絲銀租賦以北京伐木三千戶屯田平灤  
立豐贍昌國濟民三署秩五品設達嚕噶齊令承直長

各一員女人國貢海人置河西務馬站九月辛卯東京  
誼靜麟威遠博索等處大霖雨江水溢沒民田大定金  
源高州武平興中等處霜電傷稼丁酉熒惑犯長垣已  
亥湖廣省臣言海南瓊州路安撫使陳仲達南寧軍總  
管謝有奎延攔總管符庇成以其私船百二十艘黎兵  
千七百餘人助征交趾詔以仲達仍為安撫使佩虎符  
有奎庇成亦仍為沿海管軍總管佩金符庚子太白犯  
天江給諸王巴拜所部窮乏者鈔萬一千錠禁市毒藥

者以西京平瀨路饑禁酒乙巳太陰犯畢以米二萬石  
羊萬口給阿實克所統唐古軍丁未安南國遣其中大  
夫阮文彥通侍大夫黎仲謙來貢戊申咸平懿州北京  
以納延叛民廢耕作又霜雹為災告饑詔以海運糧五  
萬石賑之辛亥熒惑犯太微西垣上將壬子太白犯南  
斗禁沮撓江南茶課高麗王王睹來朝冬十月戊午朔  
日有食之壬戌太陰犯牽牛大星甲子享于太廟僧格  
請賜葉李馬紹博果密高翥等鈔詔賜李鈔百五十錠

博果密紹翁鈔各百錠又言中書省舊在大內前哈瑪特移置於北請仍舊便從之癸酉江西行院貢特密實言廣東窮邊險遠江西福建諸寇出沒之窟乞於江南諸省分軍一萬益臣詔江西呼圖克特穆爾以軍五千付之丙子誅郭佑楊居寬戊寅僧格言北安王相府無印而安西王相獨有印實非事例乞收之諸王星納噶爾印文曰皇姪貴宗之寶寶非人臣所宜用因其分地改為濟南王印為宜皆從之從總帥汪惟和言分所部



戍四川軍五千人屯田六盤乙酉熒惑犯左執法立陝  
西寶鈔提舉司羅北甸土官火者阿禾及維摩合刺孫  
之子並內附丙戌范文虎言豪懿東京等處人心未安  
宜立省撫綏之詔立遼陽等處行尚書省以色徹肯實  
喇特穆爾並行尚書省平章政事洪察爾珠右丞伊爾  
蘇克左丞楊仁風阿喇卜丹並叅知政事十一月壬辰  
太白犯壘壁陣月暈金土二星雲南省右丞愛魯克兵  
次交趾木兀門其將昭文王以四萬人守愛魯克破之

獲其將黎石何英馳太原保德河魚禁以僧格為紫金  
光祿大夫尚書右丞相兼統制院使領功德使司事從  
僧格請以平章特穆爾代其位右丞諤爾根薩里陞平  
章政事葉李陞右丞叅知政事馬紹陞左丞陞集賢院  
秩正二品丙申熒惑犯太微東垣上相丁酉僧格言先  
皇子莽噶拉木封安西王統河西土番四川諸處王相  
府後封秦王綰二金印今嗣王阿南達仍襲安西王印  
弟阿勒坦布哈別用秦王印其下復用王傳印一藩而

二王於制非宜詔以阿南達嗣為安西王仍置王傅上  
秦王印阿勒坦布哈所署王傅罷之戊戌以巴實伯里  
漢軍及新附軍五百人屯田哈瑪爾伊蘇奇爾之地已  
亥鎮南王次思明程鵬飛與鄂囉齊等從鎮南王分道  
並進阿巴齊以萬人為前鋒庚子太白晝見大都路水  
賜今年田租十二萬九千一百八十石辛丑烏瑪喇樊  
楫程鵬飛等遂趣交趾所向克捷改衛尉院為太僕寺  
秩三品仍隸宣徽以伊徹察喇托克托呼領之丙午鎮

南王次界河交趾發兵拒守前鋒皆擊破之已酉詔議  
弭盜僧格伊蘇特穆爾言江南歸附十年盜賊迄今未  
靖者宜降旨立限招捕而以安集責州縣之吏其不能  
者黜之葉李言臣在漳州十年詳知其事大抵軍官嗜  
利與賊通者尤難弭息宜令各處鎮守軍官例以三年  
轉徙庶革斯弊帝皆從其議行之封駙馬特穆爾濟寧  
郡王壬子以江西行省平章呼圖克特穆爾督捕廣東  
等處盜賊甲寅命京畿濟寧兩漕運司分掌漕事鎮南

王次萬叔諸軍畢會獲福建首賊張治國其黨皆平諭江南四省招捕盜賊丙辰熒惑犯進賢十二月癸亥立尚秉寺順元宣慰使圖嚕庫言金竹寨主搔驢等以所部百二十五寨內附甲子皇子北安王置王傅凡軍需及本位諸事並以王傅領之丙寅太陰犯畢太白晝見丁卯減揚州省歲額米十五萬石以鹽引五十萬易糧免浙西魚課三千錠聽民自漁發河西甘肅等處富民千人往色辰地與漢軍新附軍雜居耕植從安西王阿

南達請設本位諸匠都總管府陞萬億庫官秩四品癸酉鎮南王次茅羅港攻浮山寨破之諸王色徹圖等所駐之地雨土七晝夜羊畜死不可勝計以鈔暨幣帛綿布雜給之計直鈔萬四百六十七錠丁丑以朱清張瑄海漕有勞遙授宣慰使乙酉鎮南王以諸軍渡富良江次交趾城下敗其守兵日烜與其子棄城走敢喃堡是歲命西僧嘉勒燦旺布博斯噶等作佛事坐靜于大殿寢殿萬壽山五臺山等寺凡三十三會斷天下死刑百

二十一人浙西諸路水免今年田租十之二西京北京  
隆興平灤南陽懷孟路風電害稼保定太原河間及般  
陽順德南京真定河南等路霖雨害稼太原尤甚屋壞  
壓死者衆平陽春旱二麥枯死秋種不入土輦昌雨電  
好妨為災分賜皇子諸王駙馬集賽台等羊馬鈔總二  
十五萬三千五百餘錠又賜諸王集賽台等軍人馬一  
萬二千二百羊二萬二千六百駝百餘賑貧乏者哈喇  
哈達等鈔四萬八千二百五十錠

元史卷十四



元史本紀卷十四考證

至元二十三年二月丙午太陰犯井 案原本誤以丙  
午日事倒置丁未之後今改

七月壬申置中尚監 按百官志至元十五年置尚用  
監二十四年改置中尚監與此異

七月壬午平章政事和塔拉別議 案和塔拉原文忽  
都魯此處又訛都忽魯今併改

至元二十四年閏二月甲申太陰犯牽牛 案甲申原

文作甲辰二月壬辰朔計至閏二月朔非辛酉即壬戌月內不應有甲辰今據前後干支改

乙酉停不急之務 原本急訛給今案文義改

十一月丁酉僧格言先是皇子莽噶拉封安西王 案莽噶拉原文忙阿剌此又訛忙哥剌今併改

欽定四庫全書

元史卷十五

明翰林學士亞中大夫知制誥兼修國史宋濂等修

本紀第十五

世祖十二

二十五年春正月日烜復走入海鎮南王以諸軍追之  
不及引兵還交趾城命烏瑪喇將水兵迎張文虎等糧  
船又發兵攻其諸寨破之己丑詔江淮省管內並聽孟

古岱節制庚寅祭日于司天臺賜諸王和尼齊銀五百兩珠一索錦衣一襲伊都銀千兩珠一索錦衣一襲辛卯尚書省臣言初以行省置丞相與內省無別罷之今江淮平章政事孟古岱所統地廣事繁乞依前為丞相詔以孟古岱為右丞相以蘄黃二州壽昌軍隸湖廣省毀中統鈔板乙未賞征東功從乘輿將吏陞散官二階軍士鈔人三錠從皇孫將吏陞散官一階軍士鈔人二錠死者給其家十錠凡為鈔四萬一千四百二十五錠

丁酉遣使代祀嶽瀆東海后土戊戌大赦敕弛遼陽魚  
獵之禁惟毋殺孕獸壬寅高麗遣使來貢方物賀州賊  
七百餘人焚掠封州諸郡循州賊萬餘人掠梅州癸卯  
海都犯邊敕駙馬昌吉諸王伊扎爾察球爾哈坦兩千  
戶皆發兵從諸王珠卜北征詔賜諸王琳沁部曲鈔三  
萬錠章吉特舉兵叛諸王巴爾達噶遣追之至巴喇來  
不及而還甲辰伊蘇布哈謀叛逮至京師誅之己巳太  
陰犯角蠻洞十八族饑餓死者二百餘人以鈔千五百

錠有奇市米賑之丙午畋于近郊以平江鹽兵屯田于淮東西杭蘇二州連歲大水賑其尤貧者戊申太陰犯房己酉詔中興西涼無得沮壞河渠兩淮兩淞無得沮壞歲課發海運米十萬石賑遼陽省軍民之饑者辛亥省器盒局入諸路金玉人匠總管府癸丑詔行大司農司各道勸農屯田司巡行勸課舉察勤惰歲具府州縣勸農官實迹以為殿最路經歷官縣尹以下並聽裁決或怙勢作威侵官害農者從提刑按察司究治募民能

耕江南曠土及公田者免其差役三年其輸租免三分之一江淮行省言兩淮土曠民寡兼并之家皆不輸稅又管內七十餘城止屯田兩所宜增置淮東西兩道勸農營田司督使耕之制曰可二月丁巳改濟州漕運司為都漕運司併領濟之南北漕京畿都漕運司惟治京畿鎮南王引兵還萬刼烏瑪喇迎張文虎等糧船不至諸將以糧盡師老宜全師而還鎮南王從之戊午命李庭整漢兵五千東征賜葉李平江嘉興田四頃庚申司

徒色埒默等進讀祖宗實錄帝曰太宗事則然睿宗少  
有可易者定宗固日不暇給憲宗汝獨不能憶之耶猶  
當詢諸知者徵大都南諸路所放扈從馬赴京官給芻  
粟價令自糴之無擾諸縣民遼陽武平等處饑除今年  
租稅及歲課貂皮浚滄州鹽運渠辛酉孟古岱呼圖克  
言其軍三年薦饑賜米五百石壬戌省遼東海西道提  
刑按察司入北京江南湖北道提刑按察司入荆南敕  
江淮勿捕天鵝弛魚鰲禁丙寅賜雲南王塗金駝鈕印



改南京路為汴梁路北京路為武平路西京路為大同  
路東京路為遼陽路中興路為寧夏府路改江西茶運  
司為都轉運使司并權酒醋稅改河渠提舉司為轉運  
司江淮總攝嘉禾楊喇勒智言以宋宮室為塔一寺五已  
成詔以水陸地百五十頃養之詔徵葛洪山隱士劉彥  
深甲戌蓋州旱民饑蠲其租四千七百石已卯以高麗  
國王王晫復為征東行尚書省左丞相豪懿州饑以米  
十五萬石賑之禁遼陽酒京師水發官米下其價糶貧

民以江南站戶貧富不均命有司料簡合戶稅至七十石當馬一匹並免雜徭獨戶稅逾七十石願入站者聽合戶稅不得過十石獨戶稅無上百石辛巳以杭州西湖為放生池壬午鎮南王命烏瑪喇樊楫將水兵先還程鵬飛達春將兵護送之以御史臺監察御史提刑按察司多不舉職降詔申飭之命皇孫雲南王額森特穆爾帥兵鎮大理等處三月丙戌諸王昌通部曲饑給糧三月丁亥熒惑犯太微東垣上相戊子太陰犯畢車駕

還宮松江民曹夢炎願歲以米萬石輸官乞免他徭且求官職僧格以為請遙授淞東道宣慰副使改曲靖路總管府為宣撫司庚寅大駕幸上都改闡遺所為闡遺監陞正四品敕遼陽省伊奇喇斯烏嚕古扎拉滿特默齊自懿州東征李庭遙授尚書左丞食其祿將漢兵以行江淮行省孟古岱言宜除軍官更調法死事者增散官病故者降一等帝曰父兄雖死事子弟不勝任者安可用之苟賢矣則病故者亦不可降也辛卯以六衛漢

兵千二百新附軍四百屯田兵四百造尚書省鎮南王  
以諸軍還張文虎糧船遇賊兵船三十艘文虎擊之所  
殺畧相當費拱辰徐慶以風不得進皆至瓊州凡亡士  
卒二百二十八船十一艘糧萬四千三百石有奇癸巳  
賜諸王珠卜銀五萬兩幣帛各一萬匹烏爾圖扎濟古  
爾銀五千兩幣帛各一百甲午禁捕鹿羔鎮南王次內  
傍關賊兵大集遏歸師鎮南王由單已縣趣益州間道  
以出乙未以往歲北邊大風雪已圖魯古倫所部牛馬

多死賜米千石丁酉駐蹕野狐嶺命阿克蘇塔布岱總  
京城守諸軍己亥太陰掩角壬寅禮部言會同館番夷  
使者時至宜令有司倣古職貢圖繪而為圖及詢其風  
俗土產去國里程籍而錄之實一代盛事從之鎮南王  
次思明州命愛魯克引兵還雲南鄂囉齊以諸軍北還  
日烜遣使來謝進金人代己罪己己詔江西管內並聽  
行尚書省節制戊申改山東轉運使司為都轉運使司  
兼濟南路酒稅醋課己酉徐邳屯田及靈壁濉寧二屯

雨雹如雞卵害麥甲寅循州賊萬餘人寇漳浦泉州賊  
二千人寇長泰汀贛畬賊千餘人寇龍溪皆討平之夏  
四月丙辰萊縣蒲臺旱饑出米下其直賑之戊午太陰  
犯井庚申以武岡寶慶二路荐經寇亂免今年酒稅課  
及前歲逋租辛酉從行泉府司沙布鼎烏瑪喇請置鎮  
撫司海船千戶所市舶提舉司省平陽投下總管府入  
平陽路雜造提舉司入雜造總管府僧格言自至元丙  
子置應昌和羅所其間必多盜詐宜加鉤考扈從之臣

種地極多宜依軍站例除四頃之外驗畝征租並從之  
癸亥渾河決發軍築堤捍之乙丑廣東賊董賢舉等七  
人皆稱大老聚衆反剽掠吉贛瑞撫龍興南安韶雄汀  
諸郡連歲擊之不能平江西行樞密院副使頁特密實  
請益兵江西行省平章呼圖克特穆爾亦以地廣兵寡  
為言詔江淮省分萬戶一軍詣江西俟賊平還翼戊辰  
浚奇味河以溉衆諾爾黃土山民田庚午立鴻吉哩站  
癸酉尚書省臣言近以江淮饑命行省賑之吏與富民

因緣為姦多不及於貧者今杭蘇湖秀四州復大水民鬻妻女易食請輟上供米二十萬石審其貧者賑之帝是其言甲戌萬安寺成佛像及窗壁皆金飾之凡費金五百四十兩有奇水銀二百四十斤遼陽省新附軍逃還各衛者令助造尚書省仍命分道招集之增立直沽海運米倉命征交趾諸軍還家休息一歲敕緬中行省比到緬中一稟雲南王節制唐辰安南國王陳日烜遣中大夫陳克用來貢方物賜諸王錫錫金百兩銀萬兩



鈔千錠及幣帛有差辛巳賜諸王阿齊齊金二百兩銀  
二萬二千五百兩鈔九千錠及紗羅絹布有差命甘肅  
行省發新附軍三百人屯田額齊訥陝西省督鞏昌兵  
五千人屯田六盤山癸未雲南省右丞愛魯克言自發  
中慶經羅羅白衣入交趾往返三十八戰斬首不可勝  
計將士自都元帥以下獲功者四百七十四人甲申詔  
皇孫撫諸軍討叛王和斯果斯哈坦多羅干五月丙戌  
敕武平路括馬千匹戊子諸王察罕子庫庫岱叛緯和

爾執之以來已丑汴梁大霖雨河決襄邑漂麥禾以左  
右集賽衛士及漢軍五千三百人從皇孫北征甲午發  
五衛漢兵五千人北征乙未僧格言中統鈔行垂三十  
年省官皆不知其數今已更用至元鈔宜差官分道置  
局鈎考中統鈔本從之丙申賜諸王已拜金百兩銀萬  
兩金素段五百紗羅絹布等四千五百烏瑪喇來獻璞  
玉丁酉平江水免所負酒課減米價賑京師改雲南烏  
撒宣撫司為宣慰司兼管軍萬戶府戊戌復蘆臺越支

三义沽三鹽使司旺嘉努呼嚕古岱察罕復舉兵反已  
亥雲南行省言金沙江西通安等五城宜依舊隸察罕  
章宣撫司金沙江東永寧等處五城宜廢以北勝施州  
為北勝府從之壬寅渾天儀成運米十五萬石詣懿州  
餉軍及賑饑民乙巳罷興州採蜜提舉司營上都城內  
倉丁未奉安神主于太廟戊申太白犯畢賜已圖布琳  
金百五十兩銀萬五千兩及幣帛紗羅等萬匹辛亥孟  
州烏河川雨雹五寸大者如掌癸丑詔湖廣省管內並

聽平章政事圖們約蘇穆爾節制遷四川省治重慶復  
遷宣慰司於成都高麗遣使貢方物詔四川管內並聽  
行尚書省節制河決汴梁太康通許杞三縣陳潁二州  
皆被害六月甲寅以新附軍修尚食局庚申賑諸王達  
勒巴部曲之饑者及桂陽路饑民辛酉禁上都桓州應  
昌隆興酒壬戌賜諸王珠卜金銀皆二百五十兩幣帛  
紗羅萬匹乙丑詔蒙古人總漢軍閱習水戰丁卯又賜  
諸王珠卜銀二萬五千兩幣帛紗羅羅萬匹復立咸平至

建州四驛以延安屯田總管府復隸安西省戊辰海都將額布勒綽諾犯伊爾根諾爾管軍元帥阿爾台戰却之壬申睢陽霖雨河溢害稼免其租千六十石有奇命諸王齊哩克昆及扈從臣轉米以饋將士之從皇孫者太醫院光祿寺儀鳳司侍儀司拱衛司皆毋隸宣徽院罷教坊司入拱衛司癸酉詔加封南海明著天妃為廣祐明著天妃甲戌太白犯井改西南番總管府為永寧路乙亥以考城陳留通許杞太康五縣大水及河溢沒

民田蠲其租萬五千二百石丙子給兵五十人衛朔西  
宣慰使史弼使任治盜之責丁丑太陰犯歲星發兵千  
五百人詣漢北浚井癸未處州賊柳世英寇青田麗水  
等縣朔東道宣慰副使史耀討平之資國富昌等一十  
六屯雨水蝗害稼秋七月甲申朔復葺興靈二州倉命  
實保齊哈喇齊呼雅克齊左右衛士轉米輸之委省官  
督運以備賑給丙戌真定汴梁路蝗運大同太原諸倉  
米至新城為邊地之儲以南安瑞贛三路連歲盜起民

多失業免逋稅萬二千六百石有奇弛寧夏酒禁發大  
同路粟賑流民保定路霖雨害稼蠲今歲田租改儲待  
所為提舉司敕征交趾兵官還家休息一歲壬辰遣筆  
且齊以鈔五千錠往應昌和糴軍儲改會同館為四賓  
庫戊戌駐驛蘇尼雅爾之地同知江西行樞密院事頁  
特密實上言近以盜起廣東分江西江淮福建三省兵  
萬人令臣將之討賊臣願萬人內得蒙古軍三百并臣  
所籍降戶萬人置萬戶府以蘇默格爾為達嚕噶齊佩

虎符詔許之以沐川等五寨割隸嘉定者還隸馬湖蠻  
部總管府已亥熒惑犯氐盾子太白犯鬼膠州連歲大  
水民採橡而食命減價糴米以賑之霸淞二州霖雨害  
稼免其今年田租乙巳太陰掩畢諸王伊津部曲饑分  
五千戶就食濟南保定路唐縣野蠶蠶絲可為帛壬子  
命鄂端戍兵三百一十人屯田命六衛造軍器八月癸  
丑諸王伊津言臣近將濟寧投下蒙古軍東征其家皆  
乏食願賜濟南路歲賦銀使易米而食詔遼陽省給米



萬石賑之丙辰熒惑犯房素之萍鄉縣進嘉禾詔安圖  
以本部集賽蒙古軍三百人北征己未太白犯軒轅大  
星辛酉免江州學田租癸亥尚書省成壬申安西省管  
內大饑蠲其田租二萬一千五百石有奇仍貸粟賑之  
癸酉以河間等路鹽運司兼管順德廣平綦陽三鐵冶  
丙子發米三千石賑穆齊爾岱所部饑民趙晉冀三州  
蝗丁丑嘉祥魚臺金鄉三縣霖雨害稼蠲其租五千石  
庚辰車駕次博囉罕諾爾以咸平薦經兵亂發瀋州倉

賑之分萬億庫為寶源賦源綺源廣源四庫九月癸未  
朔熒惑犯天江大駕次野狐嶺甘州旱饑免逋稅四千  
四百石丙戌置汀梅二州驛己丑獻莫二州霖雨害稼  
免田租八百餘石壬辰大駕至大都乙未罷檀州淘金  
戶都勒齊犯邊庚子太陰犯畢鬼國建都皆遣使貢方  
物從僧格請營五庫禁中以貯幣帛癸卯熒惑犯南斗  
命呼圖克民戶履地輸稅尚書省臣言自立尚書省凡  
倉庫諸司無不鉤考宜置徵理司秩正三品專治合追

財穀以甘肅等處行尚書省叅政圖魯英格簽省吳誠並為徵理使從之陞寶鈔總庫永盈庫並為從五品改八作司為提舉八作司秩正六品增元寶永豐及八作司官吏俸庚戌太醫院新編本草成冬十月己未享于太廟庚申從僧格請以省院臺官十二人理算江淮江西福建四川甘肅安西六省錢穀給兵使為衛烏斯藏宣慰使日諾滿旺布嘗賑其管內兵站饑戶僧格請賞之賜銀二千五百兩甲子置虎賁司復改為武衛司丙

寅賜瀛國公趙鼎鈔百錠以甘州轉運司隸都省湖廣省言左右江口溪洞蠻獠置四總管府統州縣洞百六十而所調官畏憚瘴癘多不敢赴請以漢人為達嚕噶齊軍官為民職雜土人用之就擬瓜爾佳薩哈等七十四人以聞從之大同民李伯祥蘇永福八人謀逆伏誅庚午海都犯邊僧格請明年海道漕運江南米須及百萬石又言安山至臨清為渠二百六十五里若開浚之為工三百萬當用鈔三萬錠米四萬石鹽五萬斤其陸

運夫萬三千戶復罷為民其賦入及芻粟之估為鈔二萬八千錠費畧相當然渠成亦萬世之利請以今冬備糧費來春浚之制可丙子始造鐵羅圈甲瀛國公趙鼎學佛法于土番已郊額布根入寇巴特瑪喇實引兵擊之塔布岱及呼喇呼安塔哈等戰却之詔免儒戶雜徭尚書省臣請令集賢院諸司分道鉤考江南郡學田所入羨餘貯之集賢院以給多才藝者從之給倉官俸高麗遣使來貢方物十一月壬午鞏昌路薦饑免田租之

半仍以鈔三千錠賑其貧者以和斯瑪鼎為管領甘肅  
陝西等處屯田等戶達嚕噶齊督阿端喀什噶爾工匠  
千五十戶屯田丁亥金齒遣使貢方物以山東東西道  
提刑按察使何榮祖為中書省叅知政事修國子監以  
居胄子禁有分地臣私役富室為柴米戶及賦外雜徭  
柳州民黃德清叛潮州民蔡猛等拒殺官軍並伏誅庚  
寅青克呼克引兵犯建州殺三百餘人咸平大震辛卯  
烏梁海饑民多殍死給三月糧壬辰罷建昌路屯田總

管府癸巳賜諸王伊爾根金五十兩銀五千兩鈔千錠  
幣帛紗羅等二千匹伊蘇岱爾雅凌海拉遜執袞袞呼  
圖克岱爾兩叛王歸甲午北兵犯邊詔福建省管內聽  
行尚書省節制丙申哈瑪爾民饑種不入土命阿雅噶  
齊以屯田餘糧給之己亥命李思衍為禮部侍郎充國  
信使以萬努為兵部郎中副之同使安南詔諭陳日烜  
親身入朝否則必再加兵大都民史吉等請立僧格德  
政碑從之辛丑馬八兒國遣使來朝特爾默入寇甲辰

以鞏昌便宜都總帥府統五十餘城兵民事繁改為宣慰使司兼便宜都總帥府改釋教總制院為宣政院秩從一品印用三臺以尚書右丞相僧格兼宣政使庚戌益咸平府戍兵三百十二月乙卯賜阿勒達爾圖等金千二百五十兩銀十二萬五千兩鈔二萬五千錠幣帛布氍毹二萬三千六百六十六匹命上都募人運米萬石赴和林應昌府運米三萬石給鴻吉哩軍丁已海都犯邊巴圖約蘇圖迎擊死之先是安圖將兵臨邊為錫



里濟所執一軍皆沒至是巴林來歸從者凡三百九十人賜鈔萬二千五百一十三錠辛酉太陰犯畢癸亥置大都等路打捕民匠等戶總管府甲子太陰犯井辛未僧格言有分地之臣例以貧乏為辭希覬賜與財非天墜地出皆取於民苟不慎其出入恐國用不足帝曰自今不當給者汝即畫之當給者宜覆奏朕自處之甲戌太陰犯亢熒惑犯壘壁陣安西王阿南達來告兵士饑且闕橐駝詔給米六千石及橐駝百乙亥湖頭賊張治

因掠泉州免泉州今歲田租丙子伊蘇布哈以實勒們  
叛甘肅行省官約諸王巴拜巴爾達噶駙馬昌吉合兵  
討之皆自縛請罪獨實勒們以其屬西走追至圖魯卜  
台之地獲之歸于京師庚辰六衛屯田饑給更休三千  
人六十日糧高麗國王遣使來貢方物是歲賜諸王阿  
雅噶齊等金千兩銀一萬八千三百六十兩絲萬兩綿  
八萬三千二百兩金素幣一千二百匹絹五千九十八  
匹賜皇子阿雅噶齊部曲羊馬鈔二十九萬百四十七

錠馬二萬六千九百一十四羊十萬二百一十駝八牛  
九百賙諸王貧乏者鈔二十一萬六百錠馬六千七百  
二十五羊一萬二千八百五十七牛四十賜妻子家貲  
沒于寇者鈔三萬二千八百八十錠馬羊百償以羊馬  
諸物供軍者鈔千六百七十四錠馬四千三百二十五  
羊三萬四千百九十九駝七十二牛三十賞自寇中拔  
歸者鈔四千七十八錠因雨雹河溢害稼除民租二萬  
二千八百石命伊實滿等七百餘人作佛事坐靜于玉

塔殿寢殿萬壽山護國仁王等寺凡五十四會天師張  
宗演設醮三日以光祿寺直隸都省置醴源倉分太倉  
之麴米藥物隸焉以滄州之軍營城為滄溟縣以施州  
之清江縣隸夔路總管府罷安和署大司農言耕曠地  
三千五百七十頃立學校二萬四千四百餘所積義糧  
三十一萬五千五百餘石斷死罪九十五人

二十六年春正月丙戌地震詔江淮省孟古岱與博羅  
默色哈雅及頁特密實合兵討羣盜之未平者己丑發

兵塞沙陀間德勒格爾河辛卯巴圖布琳言其民千一百五十八戶貧乏賜銀十萬五千一百五十兩徙江州都轉運使司治龍興沙布鼎上市舶司歲輸珠四百斤金三千四百兩詔貯之以待貧乏者哈坦入寇戊戌以荆湖占城省左丞唐古特副諳達呼圖克為蒙古都萬戶統兵會江淮福建二省及頁特密實兵討盜于江西蠲漳汀二州田租辛丑遣使代祀岳瀆后土東南海立武衛親軍都指揮使司以侍衛軍六千屯田軍三千江

南鎮守軍一千合兵一萬隸馬太陰犯氐壬寅海船萬戶府言山東宣慰使樂實所運江南米陸負至淮安易閘者七然後入海歲止二十萬石若由江陰入江至直沽倉民無陸負之苦且米石省運估八貫有奇乞罷膠萊海道運糧萬戶府而以漕事責臣當歲運三十萬石詔許之癸卯高麗遣使來貢方物賊鍾明亮寇贛州掠寧都據秀嶺詔發江淮省及隣郡戍兵五千遷江西省叅政管如德為左丞使將兵往討畬民丘大老集衆千

人寇長泰縣福州達嚕噶齊托歡同漳州路總管高傑  
討平之甲辰復立光祿寺戊申徙廣州按察司於韶州  
以荆南按察司所統遼遠割三路入淮西二路入江西  
立咸平至諾延驛十五所廢甘州路宣課提舉司入寧  
夏都轉運使司遣叅知政事張守智翰林直學士李天  
英使高麗督助征日本糧二月辛亥朔詔籍江南戶口  
凡北方諸色人寓居者亦就籍之濬滄州御河癸丑阿  
雅噶齊請以所部軍屯田咸平懿州以省糧餉己未發

和林糧千石賑諸王和尼齊部曲置延禧司秩正三品  
壬戌哈瑪爾饑命甘肅省發米千石賑之癸亥詔立崇  
福司為從二品徙江淮省治杭州改浙西道宣慰司為  
淮東道宣慰司治揚州丙寅尚書省臣言行泉府所統  
海船萬五千艘以新附人駕之緩急殊不可用宜招集  
納延及星納噶爾流散戶為軍自泉州至杭州立海站  
十五站置船五艘水軍二百專運番夷貢物及商販奇  
貨且防禦海道為便從之命福建行省貝降江西行院



頁特密實江淮行省孟古岱合兵擊賊江西大都路總  
管府判官蕭儀嘗為僧格掾坐受賊事覺帝貸其死欲  
徙為淘金僧格以儀嘗鈎考萬億庫有追錢之能足贖  
其死宜解職杖遣之帝曲從之丁卯幸上都以中書右  
丞相巴延知樞密院事將北邊諸軍成都管軍萬戶劉  
德祿上言願以兵五千人招降八番蠻夷因以進取交  
趾樞密院請立元帥府以雅爾哈及德祿並為都元帥  
分四川軍萬人隸之帝從之以拜達勒為中書平章政

事紹興大水詔免未輸田租哈坦兵寇呼嚕口開元路  
治中烏延雅勒呼格戰連日破之己巳立左右翼萬戶  
府秩從三品伊嚕勒奏江南盜賊凡四百餘處宜選將  
討之帝曰頁特密實屢以捷聞孟古岱已往卿無以為  
慮皇孫噶瑪拉所部軍乏食發大同路權場糧賑之甲  
戌命鞏昌便宜都總帥汪惟和將所部軍萬人北征令  
過關受命乙亥省屯田六署為營田提舉司三月庚辰  
朔日有食之台州賊楊鎮龍聚衆寧海僭稱大興國寇

東陽義烏浙東大震諸王昂吉爾岱時謫婺州帥兵討之立雲南屯田供軍儲僧格言省部成案皆財穀事當令監察御史即省部稽照書姓名於卷末仍命侍御史堅通視之失則連坐從之安西饑減估糶米二萬石甘肅饑發鈔萬錠賑之己丑賜陝西屯田總管府農器種粒癸巳東流縣獻芝甲午太陰犯亢乙未鑄渾天儀成癸巳金齒人塞完以其民二十萬一千戶有奇來歸仍進象三夏四月己酉復立營田司于寧夏府遼陽省管

內饑貸高麗米六萬石賑之壬子博囉岱上巴實伯里  
招集戶數令甘肅省賑之癸丑命塔海呼圖圖克布哈  
等所部軍屯狗站北以禦寇寶慶路饑減價糴米萬一  
千石丙辰命甘肅行省給哈達所部饑者粟丁巳遣官  
驗視諸王昂輝貧民給以糧戊午禁江南民挾弓矢犯  
者籍而為兵置江西福建打捕鷹坊總管府福建轉運  
司及管軍總管言其非宜詔罷之省江淮屯田打捕提  
舉司七所存者徐邳海州揚州兩淮淮安高郵昭信安

豐鎮巢蘄黃魚網石湫猶十二所甲子池州貴池縣民  
王勉進紫芝十二本戊辰安南國王陳日烜遣其中大  
夫陳克用等來貢方物己巳奇爾濟蘇戶居和林驗其  
貧者賑之庚午沙河決發民築堤以障之癸酉以高麗  
國多產銀遣工即其地發旁近民治以輸官以萊蕪鐵  
冶提舉司隸山東鹽運司甲戌以御史大夫伊嚕勒為  
太傅加開府儀同三司簽江西等處行尚書省事召江  
淮行省叅知政事實都赴闕以戶部尚書王巨濟專理

算江淮省左丞相孟古岱總之置湖東江東江西湖廣  
福建木綿提舉司責民歲輸木綿十萬匹以都提舉司  
總之罷皇孫阿勒坦布哈所設斷事官額森收其印尚  
書省臣言鞏昌便宜都總帥府已陞宣慰使司乞以舊  
兼府事別立散府調官分治從之立諸王阿雅噶齊投  
下人匠提舉司於益都并省雲南大理中慶等路州  
縣丁丑陞市令司為從五品改大都路甲匠總管府為  
軍器人匠都總管府尚書省臣言納延以反誅其人戶

月給米萬七千五百二十三石父母妻子俱在北方恐  
生它志請徙置江南充沙布鼎所請海船水軍從之五  
月庚辰發武衛新軍千人濬河西務至通州漕渠癸未  
移諸王錫錫饑民就食汴梁發大同宣德等路民築倉  
於茂烏拉壬辰太白犯鬼日諾爾旺布私以金銀器皿  
給諸王徹伯爾赫伯等且供饋有勞命如數償之復賞  
銀五萬兩幣帛各二千匹丙申詔季陽益都淄萊三萬  
戶軍久戍廣東疫死者衆其令二年一更賊鍾明亮率

衆萬八千五百七十三人來降江淮福建江西三省所  
抽軍各還本翼行御史臺復徙於揚州濶西提刑按察  
司徒蘇州以叅知政事實都為尚書左丞中書叅知政  
事何榮祖為叅知政事叅議尚書省事張天祐為中書  
叅知政事己亥設回回國子學陞利用監為從三品遼  
陽路饑免往歲未輸田租尚書省臣言括大同平陽太  
原無籍民及人奴為良戶畧見成效益都濟南諸道亦  
宜如之詔以農時民不可擾俟秋冬行之罷永盈庫以



所貯上供幣帛入太府監及萬億庫辛丑御河溢入會  
通渠漂東昌民廬舍以莊浪路去甘肅省遠改隸安西  
省省流江縣入渠州泰安寺屯田大水免今歲租青山  
苗蠻以不莫臺卑包等三十三寨相繼內附六月戊申  
朔發侍衛軍二千人濬衆諾爾河渠已酉鞏昌汪惟和  
言近括漢人兵器臣管內悉已禁絕自今臣凡用兵器  
乞取之安西官庫帝曰汝家不與它漢人比弓矢不汝  
禁也任汝執之辛亥詔以雲南行省地遠州縣官多闕

六品以下許本省選辟以聞桂陽路寇亂水旱下其估  
糴米八千七百二十石以賑之己未西番進黑豹庚申  
諸王奈曼忒敗哈坦兵於托果琳河丙寅永和爾犯邊  
辛巳詔遣尚書省斷事官圖魯英格理箕雲南復立雲  
南提刑按察司頁特密實請以降賊鍾明亮為循州知  
州宋士賢為梅州判官丘應祥等十八人為縣尹巡尉  
帝不允令明亮應祥並赴大都增設倒鈔庫三所遼  
陽等路饑免今歲差賦移已拜部曲饑者就食甘州海

都犯邊和林宣慰使奇卜同知奈曼岱副使巴噶圖爾  
皆反應之哈喇齊饑出粟四千三百二十八石有奇以  
賑之甲戌西南夷中下爛土等處洞長忽帶等以洞三  
百寨百一十來歸得戶三千餘乙亥金剛努寇扎蘭齊  
喇立江淮等處財賦總管府掌所籍宋謝太后貲產隸  
中宮丁丑汲縣民朱良進紫芝濟寧東平汴梁濟南棣  
州順德平灤真定霖雨害稼免田租十萬五千七百四  
十九石秋七月戊寅朔海都犯邊帝親征尚珍署屯田

大水從征者給其家已卯駙馬札濟古爾部曲饑賑之  
辛巳兩淮屯田雨電害稼蠲今歲田租雨壞都城發兵  
民各萬人完之開安山渠成河渠官禮部尚書張孔孫  
兵部郎中李處選員外郎馬之貞言開魏博之渠通江  
淮之運古所未有詔賜名會通河置提舉司職河渠事  
甲申四川山齊蠻民四寨五百五十戶內附丙戌命百  
官市馬助邊敕以圖爾哈及侍衛兵百人為僧格導從  
丁亥發至元鈔萬錠市馬于燕南山東河南太原平陽

保定河間平灤戊子太白經天四十五日庚寅鴻和爾  
鄂隆等驛乏食以鈔賑之辛卯太陰犯牛詔遣揚珠濟  
遜詣江南搜訪術藝之士癸和林所屯奇爾濟蘇等軍  
北征癸巳平灤屯田霖雨損稼甲午御河溢東平濟寧  
東昌益都真定廣平歸德汴梁懷孟蝗乙未太陰犯歲  
星丁酉命遼陽行省益兵戊戌平懿州戊戌誅信州叛  
賊鮑惠日等三十三人右丞李庭等北征辛丑發侍衛  
親軍萬人赴上都河間大水害稼壬寅賦百官家製戰

禩癸卯沙河溢鐵燈杆堤決八月壬子霸州大水民乏食下其估糶直沽倉米五千石乙卯柳之宜章縣為廣東寇所掠免今歲田租辛酉大都路霖雨害稼免今歲租賦仍減價糶諸路倉糧壬戌朔州饑發河西務米二千石減價賑糶之癸亥諸王特克實博囉岱所部皆饑敕上都留守司遼陽省發粟賑之甲子頁特密實以鍾明亮貢物來獻辛未歲星晝見癸酉以八番羅甸宣慰使司隸四川省台發二州饑免今歲田租甲戌詔兩淮

兩浙都轉運使司及江西榷茶都轉運司諸人毋得沮  
辦課改四川金竹寨為金竹府徙浙東道提刑按察司  
治婺州河東山西道提刑按察司治太原宣慰司治大  
同九月戊寅歲星犯井己卯置高麗國儒學提舉司從  
五品丙戌罷濟州泗汶漕運使司丁亥罷鄂端宣慰使  
元師府癸巳以京師糴貴禁有司拘顧商車乙未太陰  
犯畢丙申熒惑犯太微西垣上將增浙東道宣慰使一  
員江淮省平章沙布鼎言提調錢穀積怨於衆乞如約

蘇穆爾例撥戍兵三百人為衛從之平灤昌國等屯田  
霖雨害稼甲辰以保定新城定興屯田糧賑其饑貧者  
乙巳詔福建省及諸司毋沮擾魏天祐銀課冬十月癸  
丑營田提舉司水害稼太陰犯牛宿距星甲寅熒惑犯  
右執法以馳運大都米五百石有奇給皇子北安王等  
部曲乙卯以八番羅甸隸湖廣省丙辰禁內外百官受  
人饋酒食者沒其家貲之半甲子享于太廟己巳實納  
珠爾罕華山城置站一所癸酉尚書省臣言沙布鼎以



便宜增置浙東二鹽司合浙東西舊所立者為七乞官  
知鹽法者五十六人從之平灤水害稼以平灤河間保  
定等路饑弛河泊之禁閏十月戊寅車駕還大都尚書  
省臣言南北鹽均以四百斤為引今權豪家多取至七  
百斤莫若先貯鹽於席來則授之為便從之庚辰僧格  
言初改至元鈔欲盡收中統鈔故令天下鹽課以中統  
至元鈔相半輸官今中統鈔尚未可急斂宜令稅賦並  
輸至元鈔商販有中統料鈔聽易至元鈔以行然後中

統鈔可盡從之。頁特密實以首賊丘應祥董賢舉歸于京師。癸未命遼陽行省給諸王奈曼民戶乏食者。乙酉命自今所授宣勅並付尚書省。通州河西務饑民有鬻子去之他州者發米賑之。丙戌西南夷生番心榜等八族計千二百六十戶內附廣東賊鍾明亮復反以衆萬人寇梅州江羅等以八千人寇漳州。又韶雄諸賊二十餘處皆舉兵應之。聲勢張甚。詔頁特密實復與福建江西省合兵討之。且諭旨頁特密實鍾明亮既降朕令

汝遣之赴闕而汝玩常不發致有是變自今降賊其即  
遣之丁亥安南國王陳日烜遣使來貢方物左右衛屯  
田新附軍以大水傷稼乏食發米萬四百石賑之辰星  
犯房己丑太陰犯畢熒惑犯進賢庚寅江西宣慰使胡  
頤孫援沙布鼎例請至元鈔千錠為行泉府司歲輸珍  
異物為息從之以胡頤孫遥授行尚書省叅政泉府太  
卿行泉府司事詔籍江南及四川戶口丙申寶坻屯田  
大水害稼河南宣慰司請給管內河間真定等路流民

六十日糧遣還其土從之婺州賊葉萬五以衆萬人寇武義縣殺千戶一人江淮省平章布琳濟達將兵討之遣使鉤考大同錢穀及區別給糧人戶庚子取石泗濱為磬以補宮縣之樂辛丑羅斛女人二國遣使來貢方物癸卯禁殺羔羊泐西宣慰使史弼請討泐東賊以為泐東宣慰使位哈喇岱上甲辰武平路饑發常平倉米萬五千石賑之保定等屯田戶饑給九十日糧檀州饑民劉德成犯獵禁詔釋之湖廣省臣言近招降贛州賊

胡海等令將其衆屯田自給今過耕時不恤之恐生變  
命贛州路發米千八百九十石賑之乙巳緬國遣委馬  
刺菩提班的等來貢方物十一月丙午朔回回實保齊  
百八十六戶居汴梁者申命宣慰司給其田丁未禁江  
南北權要之家毋沮鹽法戊申敕尚書省發倉賑大都  
饑民壬子漳州賊陳機察等八千人寇龍巖執千戶張  
武義與楓林賊合福建行省兵大破之陳機察丘大老  
張順等以其黨降行省請斬之以警衆事下樞密院議

范文虎曰賊固當斬然既降乃殺之何以示信宜並遣赴闕從之癸丑建寧賊黃華弟福結陸廣馬勝復謀亂事覺皆論誅甲寅瓜沙二州城壞詔發軍民修完之內辰罷爾尼格所領采石提舉司發米五百八十七石給實保齊五百七十八人之乏食者丁巳平灤昌國屯戶饑賑米千六百五十六石改播州為播南路丁卯詔山東東路毋得沮淘金賑文安縣饑民陝西鳳翔屯田大水戊辰太陰犯亢己巳發米千石賑平灤饑民改平恩

鎮為丘縣武平路饑免今歲田租桓州等驛饑以鈔給之十二月丁丑蠡州饑發義倉糧賑之戊寅罷平州望都榛子二驛放其戶為民辛巳詔括天下馬一品二品官許乘五匹三品三匹四品五品二匹六品以下皆一匹平灤大水傷稼免其租錫錫坐與哈坦多羅干通謀叛伏誅紹興路總管府判官白絜矩言宋趙氏族人散居江南百姓敬之不衰久而非便宜悉徙京師僧格以聞請擢絜矩為尚書省舍人從之給伊嚕勒所招集戶

五百人九十日糧徙昂吉爾民戶貧乏者就食六盤乙酉命四川蒙古都萬戶伊蘇岱選所部軍萬人西征太白犯南斗丁亥封皇子庫庫楚為寧遠王河間保定二路饑發義倉糧賑之仍免今歲田租摩琳站經亂乏食給九十日糧命回回司天臺祭熒惑庚寅特默格之地霜殺稼圖爾哈之地饑給九十日糧甲午以管軍萬戶汪惟能為征西都元帥將所部軍入漠其先戍漠兵無令還翼乙未蠲大名清豐逋租八百四十石命甘肅行



省賑千戶額森所部人戶之饑者給鈔賑鴻和爾鄂隆  
站人戶庚子武平饑以糧二萬三千六百石賑之已延  
遣使來言邊民乏食詔賜網罟使取魚自給已圖實喇  
所部阿蘇戶饑出粟七千四百七十石賑之癸卯發麥  
賑廣濟署饑民是歲馬八兒國進花驢二寧州民張世  
安進嘉禾一本詔天下梵寺所貯藏經集僧看誦仍給  
所費俾為歲例幸大聖壽萬安寺置旃檀佛像命帝師  
及西僧作佛事坐靜二十會免災傷田租真定三萬五

千石濟寧二千一百五十四石東平一百四十七石大名九百二十五石汴梁萬三千九十七石冠州二十七石賜諸王公主駙馬如歲例為金二千兩銀二十五萬二千六百三十兩鈔一十一萬二百九十錠幣十二萬二千八百匹斷死罪五十九人

元史卷十五

元史本紀卷十五考證

至元二十五年二月壬戌省江南湖北提刑按察司入

荆南 按荆南原本訛京南今據地理志改

六月甲寅以新附軍修尚食局 按是年七月甲申朔

則甲寅亦當為六月朔日新附原本訛新府今據文  
義改

六月壬申命儀鳳司母隸宣徽院 按司字原本訛寺

今據百官志改

十二月甲戌安西王阿南達來告兵士饑 按安西原

本訛西安今據諸王表改

是歲賜諸王阿雅噶齊等 案原本脫是歲二字今據

前後史例增

二十六年二月丁卯劉德祿上言願招降八番蠻夷

按八番原文訛八悉今據地理志改

閏十月辛丑羅斛女人二國來貢 案原本二字誤在

人字上今據明南監本改

閏十月乙巳緬國遣使來貢方物 案乙巳原本訛丙  
午下文十一月丙午朔而上文又有甲辰其為乙巳  
之誤無疑今改



欽定四庫全書

元史卷十六

明翰林學士亞中大夫知制誥無修國史宋濂等修

本紀第十六

世祖十三

二十七年春正月戊申改大都路總管府為都總管府  
庚戌太白犯牛改儲侍提舉司為軍儲所秩從三品以  
河東山西道宣慰使阿里和卓為尚書右丞宣慰使如

故癸丑太陰犯井敕從臣子弟入國子學安南國王陳  
日烜遣其中大夫陳克用來貢方物乙卯造祀天幄殿  
高麗國王王晷遣使來貢方物丁巳遣使代祀岳瀆海  
神后土戊午遼陽自納延之叛民甚疲敝發鈔五千八  
十錠賑之己未賜鎮遠王伊克圖靖遠王哈達塗金銀  
印各一章吉特寇喀木尼諸王珠卜巴爾達噶琳沁擊  
走之庚申賑馬站戶饑給塔齊爾回回屯田三千戶牛  
種辛酉營懿州倉壬戌造長甲給北征軍乙丑色辰巴



爾珠德勒伊喇色實舒穆魯摩多謀不軌伏誅丙寅哈  
坦餘寇未平命高麗國發耽羅戍兵千人討之賜河西  
質子軍五百人馬丁卯癸亥犯房高麗國王王晷言臣  
昔宿衛京師遭林衍之叛國內大亂高麗民居大同者  
皆籍之臣願復以還高麗為民從之己巳改西南番總  
管府為永寧路辛未賜伊蘇岱爾所部萬人鈔萬錠豐  
潤署田戶饑給六十日糧無為路大水免今年田租癸  
酉實都所部巴奇爾田戶饑給九十日糧降臨淮府為

盱眙縣隸泗州復立興文署掌經籍板及江南學田錢穀哈坦寇遼東海陽二月乙亥朔立全羅州道萬戶府江西諸郡盜未平詔江淮行省分兵一千益之命太僕寺母隸宣徽院丙子新附屯田戶饑給六十日糧順州僧道士四百九十一人饑給九十日糧戊寅太陰犯畢開元路寧遠等縣饑民站戶逃徙發鈔二千錠賑之播州安撫使楊漢英進雨糧千駟馬托卜齊進羅羅斯雨糧六十刀五十弓二十己卯興州興安饑給九十日糧

庚辰巴爾達噶民戶饑給六十日糧辛巳括河間實保  
齊戶口癸未泉州地震乙酉賑新附民居昌平者丙戌  
改奉先縣為房山縣泉州地震己丑江西羣盜鍾明亮  
等復降詔徙為首者至京師給其餘黨糧浙東諸郡饑  
給糧九十日庚寅太陰犯亢辛卯復立南康興國權茶  
提舉司秩從五品發虎賁更休士二千人赴上都修城  
河間路任丘饑給九十日糧癸巳晉陵無錫二縣霖雨  
害稼並免其田租江西賊華大老黃大老等掠樂昌諸

郡行樞密院討平之舒部拉木伊克戶饑給六十日糧  
常寧州民遭羣盜之亂免其田租己亥保定路定興饑  
發粟五千二百六十四石賑之辛丑索歡禾稼不登給  
九十日糧三月乙巳中山畋戶饑給六十日糧戊申廣  
濟署饑給粟二千二百五十石以為種壬子熒惑犯鉤  
鈴薊州漁陽等處稻戶饑給三十日糧戊午出明安倉  
米賑燕巴咱爾所屬四百二十人已未改雲南蒙憐甸  
為蒙憐路軍民總管府蒙萊甸為蒙萊路放罷福建獵

戶沙魚皮戶為民以其事付有司總之發雲州民夫鑿銀洞永昌站戶饑賣子及奴產者甚衆命甘肅省贖還給米賑之併福泉二州人匠提舉司為一仍放無役者為民庚申陞御史臺侍御史正四品治書侍御史正五品增蒙古經歷一員從五品罷行司農司及各道勸農營田司增提刑按察司僉事二員總勸農事四川行省舊移重慶成都之民苦于供給詔復徙治成都立江南營田提舉司秩從五品掌僧寺貲產放壽潁屯田軍千

九百五十九戶為民撤江南戍兵代之凡工匠隸呂哈喇阿爾尼格段貞無役者區別為民詔風憲之選仍歸御史臺如舊制置金竹府大隘等四十二砦蠻夷長官癸亥建昌賊丘元等稱大老集衆千餘人掠南豐諸郡建昌副萬戶擒斬之甲子楊震龍餘衆剽浙東總兵官討賊者多俘掠良民敕行御史臺分揀之凡為民者千六百九十五人庚午以建昌路廣昌縣經鍾明亮之亂免其田租九千四百四十七石辛未太平縣賊葉大五

集衆百餘人寇寧國皆擒斬之夏四月癸酉朔大駕幸上都婺州螟害稼雷雨大作螟盡死丙子太陰犯井辛巳命大都路以粟六萬二千五百六十四石賑通州河西務等處流民芻陂屯田以霖雨河溢害稼二萬二千四百八十畝有奇免其租癸未罷海道運糧萬戶府江淮行省言近朝廷遣白絮矩來與沙布鼎議令發無并戶偕宋宗族赴京人心必致動搖江南之民方患增課料民括馬之苦宜俟他日行之從之阿實達等二百九

十五人乏食命驗其實給糧賑之改利津海道運糧萬戶府為臨清御河運糧上萬戶府諸王錫錫部曲萬二千六十一戶饑給六十日糧發六衛漢軍萬人伐木為修城具甲申以薦饑免今歲銀俸鈔具在上都大都保定河間平灤者萬一百八十錠在遼陽省者千三百四十八錠有奇丙戌遣桑節喇實等詣馬八兒國訪求方伎之士壬辰熒惑守氐十餘日癸巳河北十七郡蝗千戶額森庫庫所部民及實喇巴拜等民戶並饑敕河東



諸郡量賑之千戶額布根所部乏食敕發粟賑之太傅  
伊魯勤言招集烏哲所屬伊奇哩今已得六百二十一  
人令與高麗民屯田宜給其食敕遼陽行省驗實給之  
平山真定棗強三縣旱靈壽元氏二縣大雨雹並免其  
租丁酉以鈔二千五百錠賑昌平至上郡站戶貧乏者  
定興站戶饑給三十日糧己亥命考大都路貧病之民  
在籍者二千八百二十七人發粟二萬石賑之庚子哈  
坦復寇海陽復立安和署從六品五月己巳罷秦王典

藏司收其印括江南拉木伊克人雜畜錢帛哈坦寇開  
元戊申江西行省管如德江西行院頁特密實討反寇  
鍾明亮明亮降詔縛致闕下如德等留不遣明亮復率  
衆寇贛州樞密院以如德等違詔縱賊請詰之從之詔  
罷江西行樞密院庚戌陝西南市屯田隕霜殺稼免其  
租壬子賜諸王特穆爾等軍一萬七百人糧一人一從  
者五石二人一從者七石五斗丙辰發粟賑御河船戶  
欽州等處諸郡蠻夷進雨糧八百戊午移江西行省於

吉州以便捕盜尚書省遣人行視雲南銀洞獲銀四千  
四十八兩奏立銀場官秩從七品楚魯等千一百一十  
五戶饑給六十日糧癸亥敕諸王分地之民有訟王傳  
與所置監郡同治無監郡者王傳聽之平灤民萬五千  
四百六十五戶饑賑粟五千石徽州績溪賊胡發饒必  
成伏誅乙丑太陰犯填星丙寅罷奉宸庫遷江西行尚  
書省參政楊文琛為左丞文琛踰歲不之官詔以烏拉  
岱代之烏拉岱至文琛復署事僧格乃奏文琛陞右丞

江西行省言吉贛湖南廣東福建以禁弓矢賊益發乞  
依內郡例許尉兵持弓矢從之己巳立雲南行御史臺  
命徹爾特穆爾所部女直高麗契丹漢軍輸地稅外並  
免他徭江陰大水免田租萬七百九十石庚午復置諸  
王伊奇哩王傳秩正四品尚珍署廣脩等屯大水免其  
租巴約特民饑命薩題勒密實以車五百兩運米千石  
賑之婺州永康東陽處州縉雲賊呂重二楊元六反浙  
東宣慰使史弼擒斬之泉州南安賊陳七師反討平之

括天下陰陽戶口仍立各路教官有精于藝者歲貢各  
一人六月壬申朔陞閏鹽州為栢興府降普樂州為閏  
鹽縣金州為金縣河湓太康沒民田三十一萬九千八  
百餘畝免其租八千九百二十八石納琳等站戶饑給  
九十日糧甲戌桑州總管黃布達那州長羅光寨安郡  
州長閉光過率蠻民萬餘戶內附丙子放保定工匠楚  
通等三百四十一戶為民庚辰從江淮行省請陞廣濟  
庫為提舉司秩從五品用江淮省平章沙布鼎言以參

政王巨濟鈞考錢穀有能賞鈔五百錠繕寫金字藏經  
凡糜金三千二百四十四兩廣州增城韶州樂昌以遭  
畚賊之亂並免其田租杭州賊唐珍等伏誅己丑癸  
亥犯房辛卯敕應昌府以米千二百石給諸王伊奇哩部  
曲壬辰別給江西行省印以便分省討賊泉州大水丙  
申發侍衛兵萬人完都城丁酉大司徒色埒默翰林學  
士承旨烏魯克台進定宗實錄己亥棣州厭次濟陽大  
風雹害稼免其租庚子從江西省請發各省戍兵討賊

辛丑免河間保定平灤歲賦絲之半懷孟路武陟縣汴  
梁路祥符縣大水蠲田租八千八百二十八石秋七月  
終南等屯霖雨害稼萬九千六百餘畝免其租丙午禁  
平地明安倉釀酒犯者死戊申江西霖雨贛吉袁瑞建  
昌撫水皆溢龍興城幾沒癸丑罷緬中行尚書省江淮  
省平章沙布鼎以倉庫官盜欺錢糧請依宋法黥而斷  
其腕帝曰此回回法也不允免大都路歲賦絲戊午貴  
州獠蠻三十餘人作亂劫順元路入其城遂攻阿牙寨

殺傷官吏其衆遂盛湖廣省檄八番蔡州均州二萬戶  
府及八番羅甸宣慰司合兵討之鳳翔屯田霖雨害稼  
免其租建平賊王靜照伏誅辛酉熒惑犯天江壬戌駐  
蹕老鼠山西乙丑蕪湖賊徐汝安孫惟俊等伏誅丙寅  
雲南閣力白衣甸酋長凡十一甸內附丁卯用僧格言  
詔遣慶元路總管毛文豹搜括宋時民間金銀諸物已  
而罷之滄州樂陵早免田租三萬三百五十六石江夏  
水溢害稼六千四百七十餘畝免其租魏縣御河溢害



稼五千八百餘畝免其租百七十五石八月辛未朔日  
有食之併廣東道真陽浚光二縣為英德州沁水溢害  
翼氏民田免其租禁諸人毋沮平陽太原大同宣課丁  
丑廣州清遠大水免其租庚辰免大都平灤河間保定  
四路流民租賦及酒醋課丁亥復徙四川南道宣慰司  
于重慶府以南安贛建昌豐州嘗罹鍾明亮之亂悉免  
其田租癸巳地大震武平尤甚壓死按察司官及總管  
府官王連等及民七千二百二十人壞倉庫局四百八

十間民居不可勝計己亥帝聞武平地震慮納延黨入  
寇遣平章政事特穆爾樞密院官塔爾古岱引兵五百  
人往視九月壬寅河東山西道饑敕宣慰使阿里和卓  
鈔米賑之癸卯歲星犯鬼申嚴漢人田獵之禁乙己禁  
諸王遣僧建寺擾民敕河東山西道宣慰使阿里和卓  
發大同鈔本二十萬錠糴米賑饑民平章政事實喇特  
穆爾帥師與哈坦戰于烏法大破之丁未御河決高唐  
沒民田命有司塞之戊申武平地震盜賊乘隙剽劫民

愈憂恐平章政事特穆爾以便宜蠲租賦罷商稅弛酒  
禁斬為盜者發鈔八百四十錠轉海運米萬石以賑之  
金竹府知府掃閭貢馬及雨氊且言金竹府雖內附蠻  
民多未服近與趙堅招降竹古弄古魯花等三十餘寨  
乞立縣設長官總把叅用土人從之己酉福建省以管  
內盜賊蠢起請益戍兵命江淮省調下萬戶一軍赴之  
發蒙古都萬戶府特默齊軍五百人戍鄂州辛亥修東  
海廣德王廟丙辰赦天下丁卯命江淮行省鈎考行教

坊司所總江南樂工租賦置四巡檢司于宿遷之址以  
所罷陸運夫為兵護送會通河上供之物禁發民挽舟  
冬十月壬申封皇孫噶瑪拉為梁王賜金印出鎮雲南  
癸酉享于太廟甲戌立會通汝泗河道提舉司從四品  
丁丑尚書省臣言江陰寧國等路大水民流移者四十  
五萬八千四百七十八戶帝曰此亦何待上聞當速賑  
之凡出粟五十八萬二千八百八十九石己卯增上都  
留守司副留守判官各一員從甘肅行省請簽管內民

千三百人為兵以戍其境辛巳太白犯斗濟遜所部巴  
勒喇實等饑命寧夏路給米三千石賑之禁大同路釀  
酒乙酉默德齊自行御史臺入覲梁洞梁宮朝吳曲洞  
吳湯暖等凡二十洞以二千餘戶內附丁亥賜北邊幣  
帛十萬匹己丑新作太廟登歌宮懸樂以實保齊歲取  
鷓鴣成都擾民罷之十一月辛丑廣濟署洪濟屯大水  
免租萬三千一百四十一石興松二州隕霜殺禾免其  
租隆興苦鹽灤等驛饑發鈔七千錠賑之丁未大同路

蒙古多冒名支糧置千戶百戶十員以達嚕噶齊總之  
食糧戶以富為貧者籍家貲之半戍申太陰掩鎮星僧  
格言向奉詔內外官受命不赴及受代官居五年不赴  
銓者罷不復敘臣謂苟無大故不可終棄帝復允其請  
江淮行省平章布琳濟達言福建盜賊已平惟浙東一  
道地極邊惡賊所巢穴復遣三萬戶以哈喇岱一軍戍  
沿海明台伊奇哩一軍戍溫處札呼岱一軍戍紹興婺  
其寧國徽初用土兵後皆與賊通今以高郵泰兩萬戶

漢軍易地而戍揚州建康鎮江三城跨據大江人民繁  
會置七萬戶府杭州行省諸司府庫所在置四萬戶府  
水戰之法舊止十所今擇瀕海沿江要害二十二所分  
兵閱習伺察諸盜錢塘控扼海口舊置戰船二十艘故  
海賊時出奪船殺人今增置戰船百艘海船二十艘則  
盜賊不敢發從之庚戌罷雲南會川路采碧甸子甲寅  
禁上都釀酒乙卯桂齊三百三十戶乏食發粟賑之己  
未禁山後釀酒庚申賜巴延所將兵幣帛各萬三千四

百匹綿三千四百斤辛酉太陰掩左執法隆興路隕霜  
殺稼免田租五千七百二十三石壬戌大司徒色埒默  
翰林學士承旨烏魯克台進太宗實錄癸亥河決祥符  
義唐灣太康通許陳潁二州大被其患甲子御史臺言  
江南盜起討賊官利其剽掠復以生口充贈遺請給還  
其家帝嘉納之徙河北河南道提刑按察司治許州罷  
大都東西二驛托克托和斯以通政院總之乙丑易水  
溢雄莫任丘新安田廬漂沒無遺命有司築堤障之丙寅



括遼陽馬六千匹擇肥者給實喇特穆爾所部軍丁卯  
立新城權塲平地托克托和斯遣使鉤考延安屯田降  
南雄州為保昌縣韶州為曲江縣十二月辛未以衛尉  
院為太僕寺戊寅免大都平灤保定河間自至元二十  
四年至二十六年逋租十三萬五百六十二石己卯命  
樞密院括江南民間兵器及將士習武如戊子歲詔甲  
申遣兵部侍郎靳榮等閱實安西鳳翔延安三道軍戶  
元籍四千外復得三萬三千二百八十丁樞密院欲以

為兵僧格不可帝從之丙戌興化路仙游賊朱三十五  
集衆寇青山萬戶李綱討平之京兆省上屯田所出羊  
價鈔六百九錠敕以賜扎色安巴民貧乏者辛卯太陰  
犯亢乙未初分萬億為四庫以金銀輸內府至是立提  
舉富寧庫秩從五品以掌之大同路民多流移免其田  
租二萬一千五百八石洪贊灤陽驛饑給六十日糧巴  
爾塔斯所部茂齊哩克饑給九十日糧詔諸王奈曼岱  
遼陽行省平章政事色徹肯右丞洪察呼摘蒙古軍萬

人分戍雙城及博索府諸城防哈坦兵已亥降溧陽路  
為縣入建康湖廣省上二年宣課珠九萬五百一十五  
兩處州青田賊劉甲乙等集衆萬餘人寇温州平陽是  
歲賜諸王公主駙馬金銀鈔幣如歲例命帝師西僧遞  
作佛事坐靜于萬壽山厚載門察汗諾爾聖壽萬安寺  
桓州南屏庵雙泉等所凡七十二會斷死罪七十二人  
二十八年春正月壬寅太白熒惑鎮星聚奎癸卯給諸  
王阿雅噶齊印命玄教宗師張留孫置醮祠星三日上

都民仰食于官者衆詔傭民運米十萬石致上都官價  
石四十兩命留守茂巴爾斯總其事辛亥罷汴梁至正  
陽杞縣睢州中牟鄭唐鄧十二站站戶為民癸丑高麗  
遣使貢方物丁巳遣呼雅克齊四百人北征辛酉罷江  
淮漕運司併于海船萬戶府由海道漕運併浙西金玉  
人匠提舉司入浙西道金玉人匠總管府降無為和州  
二路六安軍為州巢州為縣入無為並隸廬州路陞安  
豐府為路降壽春府懷遠軍為縣懷遠入濠州並隸安

豐路陞各處行省理問所為四品免江淮貧民至元十二年至二十五年所逋田租二百九十七萬六千餘石及二十六年未輸田租十三萬石鈔千一百五十錠絲五千四百斤綿千四百三十餘斤罷淘金提舉司立江東兩浙都轉運使司壬戌以扎薩克托克托呼總兵于翁科之地命有司供其軍需敕大同路發米賑翁科民尚書省臣僧格等以罪罷二月辛未賜伊遜岱爾所部兵騾馬萬匹徙萬億庫金銀入禁中富寧庫尚書省言

大同仰食于官者七萬人歲用米八十萬石遣使覆驗  
不當給者萬三千五百人乞徵還官從之癸酉以隴西  
四川總攝年扎克鐘鼎為諸路釋教都總統改福建行  
省為宣慰司隸江西行省詔行御史臺勿聽行省節度  
雲南行省言敘州烏蒙水路險惡舟多破溺宜自葉稍  
水站出陸經中慶又經鹽井土老必撒諸蠻至敘州慶  
符可治為驛路凡立五站從之伊遜岱爾汪惟和言近  
制和顧和買不及軍家今一切與民同詔自今軍勿輸

丙子罷徵理司上都太原饑免至正十二年至二十六年民間所逋田租三萬八千五百餘石遣使同按察司賑大同太原民口給糧兩月或三月以僧格黨罷揚州路達魯噶齊實喇諤蘇遣官覆驗碩達勒達咸平貧民賑之丁丑以太子右詹事鄂勒哲為尚書右丞相翰林學士承旨博果密平章政事詔告天下以拉古納粳米賑給貧民己卯遣官持香詣中嶽南海淮瀆致禱立金齒等處宣慰司都元帥府以上都虎賁士二千人屯田

官給牛具農器用鈔二萬錠以雲南曲靖路宣撫司所轄地廣民心未安改立曲靖等處宣慰司管軍萬戶府以鎮之辛巳以湖廣行省八番羅甸司復隸四川省壬午以僧格沮抑臺綱又箠監察御史命御史大夫阿爾婁辨之癸未太陰犯左執法大駕幸上都是日次大口復召御史臺及中書尚書兩省官辨論僧格之罪復以闡遺監隸宣徽院詔毋沮擾山東轉運使司課程甲申太白犯昴命江淮行省鈎考沙布鼎所總詹事院江南



錢穀乙酉立江淮湖廣江西四川等處行樞密院詔諭  
中外江淮治廣德軍湖廣治岳州江西治汀州四川治  
嘉定丙戌詔改提刑按察司為肅政廉訪司每道仍設  
官八員除二使留司以總制一道餘六人分臨所部如  
民事錢穀官吏奸弊一切委之俟歲終省臺遣官考其  
功効以集賢大學士何榮祖為尚書右丞集賢學士賀  
勝為尚書省參知政事詔江淮行省遣蒙古軍五百漢  
兵千人從皇子鎮南王鎮揚州執河間都轉運使張庸

仍遣官鈎考其事丁亥營建宮城南面周廬以居宿衛之士執湖廣約蘇穆爾詣京師戊子籍約蘇穆爾家貲金四千兩辛卯封諸王特穆爾布哈為肅遠王賜印壬辰雨壞太廟第一室奉遷神主別殿癸巳籍僧格家貲遣行省行臺官發粟賑徽之績溪杭之臨安餘杭於潛昌化新城等縣饑民命江淮行省參政燕公楠整治鹽法之弊丁酉詔加嶽瀆四海封號各遣官詣祠致告三月己亥朔真定河間保定平灤饑平陽太原尤甚民流

移就食者六萬七千戶饑死者三百七十一人僧格妻  
弟巴結伊特為燕南宣慰使以受賂積贓伏誅仆僧格  
德政碑太原饑嚴酒禁丁未太陰犯御女己酉太陰犯  
右執法庚戌太陰犯太微東垣上相甲寅常德路水免  
田租二萬三千九百石乙卯太白犯五車納延所屬伊  
爾默克等同女直兵五百人追殺內附民千餘人遣塔  
海將兵千人平之辛酉埒里站穆爾齊五十戶饑賑三  
月糧發侍衛兵營紫檀殿壬戌以甘肅行省右丞崔或

為中書右丞南丹州莫國麟入覲授國麟安撫使三珠  
虎符杭州平江等五路饑發粟賑之弛湖泊捕魚之禁  
溧陽太平徽州廣德鎮江五路饑賑之如杭州武平路  
饑百姓困於盜賊軍旅免其去年田租凡州郡田嘗被  
灾者悉免其租不被灾者免十之五罷甘州轉運司江  
淮豪家多行賄權貴為府縣卒史容庇門戶遇有差賦  
惟及貧民詔江淮行省嚴禁之賑遼陽武平饑民仍弛  
捕獵之禁夏四月己巳禁屠宰牝羊甲戌詔各路府州

司縣長次官兼管諸軍鄂羅以地震故免侍衛兵籍武  
平者今歲徭役增置欽察衛經歷一員用漢人為之餘  
不得為例庚辰弛杭州西湖禽魚禁聽民網罟丙戌詔  
凡負鄂拓克銀者入還皆以鈔為則己丑歲星犯輿鬼  
以沙布鼎等米賑江南民召朱清張瑄詣闕庚寅併總  
制院入宣政院以鈔法故召葉李還京乙未徙湖廣行  
樞密院治鄂州丙申以米三千石賑奇爾濟蘇民五月  
戊戌召江西行樞密院副使阿里詣闕升章佩監秩三

品遣托克托塔喇海呼遜三人追究僧官江淮總攝嘉木揚喇勒智盜用官物以參知政事廡希恕為湖廣等處行省右丞行海北海南道宣慰使都元帥瓊州安撫使陳仲達海北海南道宣慰使都元帥湖廣行省左右司郎中布延伊蘇伯里副元帥王信並同知海北海南道宣慰司事副元帥並佩虎符將二千二百人以征黎蠻僚屬皆從仲達辟置立左右兩江宣慰司都元帥府壬寅太陰犯少民徙江淮行樞密院治建康甲辰中書

省臣敏珠爾丹崔或言僧格當國四年諸臣多賄進親  
舊皆授要官唯以欺蔽九重腹削百姓為事宜令兩省  
嚴加考覈除名為民從之約蘇穆爾以僧格妻黨為湖  
廣行省平章至是坐不法者數十事詔械致湖廣省誅  
之辛亥以太原及杭州饑免今歲田租增河東道宣慰  
使一員徵太子贊善劉因因前為太子贊善以繼母病  
去至是母亡以集賢學士徵不起罷托克托塔喇海呼  
遜等理算僧官錢穀罷江南六提舉司歲輸木綿鞏昌

舊惟總帥府僧格特陞為宣慰司以其弟達爾瑪達實  
為使僧格敗懼誅自殺至是復總帥府增置異珍御帶  
二庫秩從五品並設提點使副各一員減中外冗官三  
十七員宮城中建蒲萄酒室女工室詔以僧格罪惡繫  
獄按問誅其黨約蘇穆爾伯奇等發兵塞鴻和爾鄂隆  
地河渠修城堡令蒙古戍兵屯田川中以禦寇癸丑罷  
尚書省入中書改尚書右丞相右詹事諤勒哲為中書  
右丞相平章政事敏珠爾丹博果密並中書平章政事



尚書右丞何榮祖中書右丞尚書左丞馬紹中書左丞  
參知政事賀勝高翥並叅知中書政事征東行尚書省  
左丞相駙馬高麗國王王暉為征東行中書省左丞相  
罷大都燒鈔庫仍舊制各路昏鈔令行省官監燒增置  
戶部司計工部司程正七品甲寅太陰犯牛賑上都桓  
州榆林昌平武平寬河宣德西站女直等站饑民乙卯  
以政事悉委中書仍遣使布告中外詔禁失陷錢糧者  
託故詣京師丁巳建白塔二各高一丈一尺以居呪師

多斯德桑節等七人何榮祖以公規治民禦盜理財等  
十事緝為一書名曰至元新格命刻板頒行使百司遵  
守僧格嘗以劉秉忠無子收其田土其妻竇氏言秉忠  
嘗鞠猶子蘭章為嗣敕以地百頃還之己未以默德齊  
復為御史大夫行御史臺事高麗國王王晷乞以其子  
諲為世子詔立諲為高麗王世子授特進上柱國賜銀  
印六月丁卯朔禁蒙古人往回回地為商賈者湖廣饑  
以阿拉克哈雅米七萬石賑之辛巳洞蠻鎮遠立黃平

府乙酉以雲南諸路行省參知政事鄂諾為梁王傅洗  
國王洞主市備什王弟同來朝益江淮行院兵二萬擊  
郴州桂陽寶慶武岡四路盜賊以汴梁逃人男女配偶  
成家給農具耕種丙戌敕屯田官以三歲為滿互于各  
屯內調用宣諭江淮民恃嘉木楊喇勒智力不輸租者  
依例徵輸辛卯太陰犯畢癸巳以漣海二州隸山東宣  
慰司秋七月丙申朔雲南省參政齊喇言建都地多產  
金可置冶令旁近民煉之以輸官從之己亥太白犯井

詔諭尚州等處諸洞蠻夷庚子徙江西行樞密院治贛  
州乙巳大都饑出米二十五萬四千八百石賑之戊申  
揚州路學正李淦上言人皆知僧格用羣小之罪而不  
知尚書右丞葉李妄舉僧格之罪宜斬葉李以謝天下  
有旨驛召淦詣京師淦至而李卒除淦江陰路教授以  
旌直言給還行臺監察御史周祚妻子祚嘗劾行尚書  
省官僧格誣以他罪流祚于噶達蘇妻子家貲入官及  
是還之禁屠宰馬牛敕江南重囚依舊制聞奏處決罷

江南諸省買銀提舉司遣軍招集宋時湮手軍可充兵者八萬三千六百人以蒙古漢人宋人參為萬戶千戶百戶領之遼陽諸路連歲荒加以軍旅民苦饑發米二萬石賑之己酉召交趾王弟陳益稷右丞陳巖鄭鼎子諾海並詣京師癸丑賜師壁洞安撫司師壁鎮撫所師羅千戶所印安撫司從三品餘皆五品丁巳僧格伏誅募民耕江南曠土戶不過五頃官授券俾為永業三年後徵租遣哈克繖總兵討平江南盜賊己未降江陰路

為州宜興府為縣並隸常州路移揚子縣治新城分華  
亭之上海為縣松江府隸行省罷淘金提舉司江淮人  
匠提舉司凡五以其事並隸有司雨壞都城發兵二萬  
人築之增置各衛經歷一員俾漢人為之壬戌弛畿內  
秋耕禁八月乙丑朔平陽地震壞民廬舍萬有八百二  
十六區壓死者百五十人丙寅太白犯興鬼已巳置中  
書省檢校二員秩正七品俾考覈戶工部文案疎緩者  
罷江西等處行泉府司大都甲匠總管府廣州人匠提

舉司廣德路錄事司罷泉州至杭州海中水站十五所  
撫州路饑免去歲未輸田租四千五百石馬八兒國遣  
使進花牛二水牛土彪各一丙子太陰犯牽牛大名之  
清河南樂諸縣霖雨害稼免田租萬六千六百六十九  
石己卯詔諭思州提省溪洞官揚都要招安叛蠻悔過  
來歸者與免其本罪罷雲南四州立東川府癸未歲星  
犯軒轅大星乙酉遣默色和斯乘傳詣雲南捕黑虎戊  
子太白犯軒轅大星併犯歲星咀喃番邦遣馬不刺罕

丁進金書寶塔及黑獅子番布藥物婺州水免田租四萬一千六百五十石辛卯命工部造飛車五輛癸巳太陰掩熒惑九月辛丑以平章政事敏珠爾丹商議中書省事復以咱希魯鼎平章政事代之己巳景州河間等縣霖雨害稼免田租五萬六千五百九十五石丙午立行宣政院治杭州己酉設安西延安鳳翔三路屯田總管府庚戌太白犯右執法襄陽南漳縣民李氏妻黃一產三男辛亥安南王陳日烜遣使上表貢方物且謝不朝



之罪徽州績溪縣賊未平免二十七年田租禁宣德府  
田獵壬子酒醋課不無隸茶鹽運司仍隸各府縣立奇  
凌塔斯至威喇等六驛命海船副萬戶楊祥哈瑪爾張  
文虎並為都元帥將兵征瑠求置左右兩萬戶府官屬  
從祥選辟既又用福建吳誌斗言祥不可信宜先招諭  
之乃以祥為宣撫使佩虎符阮監兵部員外郎誌斗禮  
部員外郎並銀符齎詔往瑠求明年楊祥阮監果不能  
達瑠求而還誌斗死于行時人疑為祥所殺詔福建行

省按問會赦不治乙卯以歲荒免平灤屯田二十七年  
田租三萬六千石有奇丙辰熒惑犯左執法戊午太白  
犯熒惑徙四川行樞密院治成都以巴噶岱爾圖嚕古  
蘇伯林托爾齊四翼蒙古兵復隸蒙古都萬戶府庚申  
以特哩為禮部尚書佩虎符阿喇卜丹保喇並為侍郎  
遣使俱藍辛酉歲星犯少民免大都今歲田租保定河  
間平灤三路大水被災者全免收成者半之以拜特穆  
爾額呼斯昆為禮部侍郎使馬八兒國陝西托實為禮

部侍郎佩金符使于馬都尚衣局織無縫衣冬十月乙丑朔賜縑察溫都爾等九驛貧民三月糧己巳修太廟在真定傾壞者壬申以前緬中行尚書省平章政事舒蘇德齊為中書省平章政事癸酉享太廟遣使發倉賑大同屯田兵及嘉琿達所部軍士之饑者江淮行省言鹽課不足由私鬻者多乞付兵五千巡捕從之塔喇海張呼遜崔同知並坐理算錢穀受贓論誅辛巳召高麗國王王暕公主呼圖克庫哩頁額實詣闕癸未羅斛國

王遣使上表以金書字仍貢黃金象齒丹頂鶴五色鸚鵡翠毛犀角篤耨龍腦等物高麗國饑給米二十萬斛罷各處行樞密院事入行省割八番洞蠻自四川隸湖廣行省丙戌太陰犯軒轅大星併御女丁亥洞蠻爛土立定雲府改陳蒙洞為陳蒙州合江為合江州嚴山後酒禁中書省臣言洞蠻請歲進馬五十匹雨籩五十被刀五十握丹砂雌雄黃等物率二歲一上有詔從之己丑太陰犯太微東垣上相敕沒入嘉木楊喇勒智沙布

鼎烏瑪喇妻並遣詣京師召行省轉運司官赴京師議  
治賦法辛卯諸王徹伯爾部饑給米賑之癸巳武平路  
饑免今歲田租以武平路總管張立道為禮部尚書使  
交趾免衛輝種仙茅戶徭役從遼陽行省言以納延哈  
坦相繼叛詔給蒙古人內附者及開元南京碩達勒達  
等三萬人牛畜田器詔嚴益都般陽泰安寧海東平濟  
寧畋獵之禁犯者沒家貲之半十一月丙申以甘肅曠  
土賜實保齊哈克繖俾耕之壬寅遣左吉奉使星哈喇

特納甲辰太白犯房減太府監冗員三十一人罷器備行  
內藏二庫詔回回以塔納珠充獻及求售者還之留其  
估以濟貧者塔齊爾台民饑發米賑之給阿勒達爾民  
戶四月糧罷海道運糧鎮撫司丙午熒惑犯亢丁未太  
陰犯畢耽羅遣使貢東紆百匹太史院靈臺上修祀事  
三晝夜甲寅太陰犯歲星柳州路達嚕噶齊奇拉爾有  
罪誅復置會同館禁沮擾益都淘金己卯新添葛蠻宋  
安撫率洞官阿汾青貴來貢方物監察御史言沙布鼎

尼雅斯拉鼎烏瑪喇王巨濟嘉木楊喇勒智實迪嘉琿  
達皆僧格黨受賊肆虐使江淮民愁怨載路今或繫或  
釋臣未能喻帝曰僧格已誅尼雅斯拉鼎在獄唯沙布  
鼎朕姑釋之耳武平平灤諸州饑弛獵禁其孕字之  
時勿捕諭中書議增内外官吏俸戊午金齒國遣阿腮  
入覲庚申瑛惑犯氏辛酉陞宣德龍門鎮為望雲縣割  
隸雲州置望雲銀冶十二月乙丑復都水監秩從三品  
遣官迓雲南鴨池所遣使遼陽寬河女直部民饑借高

麗粟賑給之籍特默齊巴噶岱爾等六萬戶成丁者為兵丁卯高麗國鴨綠江西十九驛經納延反掠其馬畜給以牛各四十大都饑下其價糶米二十萬石賑之已已罷遣官招集輝和爾氏改辰沅靖州轉運司為湖北湖南道轉運司立葛蠻軍民安撫司宣政院臣言宋全太后瀛國公母子已為僧尼有地三百六十頃乞如例免徵其租從之辛未以特默為兵部尚書佩虎符密寶特達實為兵部侍郎佩金符使于羅博布爾御史臺臣言



言鈞考錢穀自中統初至今餘三十年更阿哈瑪特僧格當國設法已極其餘黨公取賄賂民不堪命不如罷之有旨議擬以聞壬申立河南江北行中書省治汴梁色埒默喇實並為大司徒領太常寺中書省臣言江南在宋時差役為名七十有餘歸附後一切未徵今分隸諸王城邑歲賜之物仰給京師又中外官吏俸少似宜量添可令江南依宋時諸名征賦盡輸之何榮祖言宜召各省官任錢穀者詣京師集議科取之法以聞從之

甲戌詔罷鈎考錢穀應昔年逋負錢穀文卷聚置一室  
非朕命而視之者有罪仍遣使布告中外庚辰太陰犯  
御女江北州郡割隸河南江北行中書省改江淮行省  
為江浙等處行中書省治杭州賑庫庫楚饑民米錫里  
岱言納延餘黨竄女直之地臣與阿爾婁議乞益兵千  
五百人可平之從之癸未太陰犯東垣上相廣濟署大  
昌等屯水免田租萬九千五百石平灤路及豐贍濟民  
二署饑出米萬五千石賑之巴圖爾丹前以僧格專恣

不肯仕命仍為中書左丞丙戌八番洞官吳金叔等以  
所部二百五十寨民二萬有奇內附詣闕貢方物戊子  
詔釋天下囚非殺人抵罪者己丑熒惑犯房庚寅熒惑  
犯鉤鈐升營田提舉司為規運提點所正四品辛卯濬  
運糧壩河築隄防授策凌巴鄂爾宜嘉勒為帝師統領  
諸國僧尼釋教賜親王公主駙馬金銀鈔幣如歲例令  
僧羅卜藏等遞作佛事坐靜于聖壽萬安涿州寺等所  
凡五十度遣真人張志仙持香詣東北海嶽濟瀆致禱

戶部上天下戶數內郡百九十九萬九千四百四十四  
江淮四川一千一百四十三萬八百七十八口五千九  
百八十四萬八千九百六十四游食者四十二萬九千  
一百一十八司農司上諸路所設學校二萬一千三百  
餘墾地千九百八十三頃有奇植桑棗諸樹二千二百  
五十二萬七千七百餘株義糧九萬九千九百六十石  
宣政院上天下寺宇四萬二千三百一十八區僧尼二  
十一萬三千一百四十八人斷死刑五十五人



元史卷十六

元史卷十六考證

世祖本紀至元二十七年二月命光祿寺毋隸宣徽院  
案光祿寺原本作太僕寺考百官志太僕寺至元  
二十四年所立隸中書省秩從二品元典章則云正  
三品皆無隸宣徽院之文蓋宣徽所掌玉食燕享諸  
事其屬則光祿居首至元二十五年撥隸省部三十  
一年仍隸宣徽史既誤以二十五年事紀于二十七  
年又誤光祿為太僕外訛今改正至其紀年之訛則

原文未便從刪仍存其舊而識之

秋七月壬戌駐蹕老鼠山 案壬戌原本作壬申以上  
文辛酉下文乙丑計之中間不應有壬申日當是戌  
之訛今改

二十八年汪惟和言近制和顧和買不及軍家今一切  
與民同 案汪惟和原本作汪總帥考汪氏自世顯  
以鞏昌降元子孫世官其地至元初襲職者為惟正  
二十二年後則惟和嗣皆世顯之孫也史例書名不



應言汪總帥今改正

